



2019-2

29. juli 2019

Nal. nr./j.nr.: 2017-104-0055

All. nr./notatnr.: 62240

Sull./sagsbeh.: KJ

Pineqartoq:

Piffissaq suliamik suliarin-
ninnermut atorneqartoq

Piffissaq meeqqap angerlarsimaffimmi avataanut inissinneqarsimasup angerlartinneqarnissaanik qinnutigisamik itigartitsineq sioqqullugu suliamik suliarinninnermut atorneqartoq pissutissaqanngitsumik sivisooq

Meeraq angerlarsimaffimmi avataani ulloq unnuarlu paaqqinniffimmut akuersisitsilluni inissiisarneq pillugu malittarisassat tunngavigalugit inissinneqassasoq Qaasuitsup Kommunia 2012-imi aprilimi aalajangiivoq. Meeqqap angerlartinneqarnissaa meeqqap angajoqqaavata kommunimut 2013-imi qinnutigaa. Piffissaq kommunip suliamik suliarinninnerminut atugaa angajoqqaap Ombudsmandimut 2017-imi naammagittaalliuutigaa.

Avannaata Kommunia – Qaasuitsup Kommuniata 1. januar 2018-imi avinneqarnerata kingornatigut suliamik tigusisoq – meeraq angerlartinneqarsinnaangitsoq 2018-imi decemberimi aalajangiivoq. Tamanna meeqqap 18-inik ukioqalinngitsiarnerani pivoq.

Avannaata Kommuniata Ombudsmandip suliamik suliarinninnerani oqaatigaa piffissap suliamik suliarinninnermut atorneqartup sivisussusia iluarinangitsutut isigigini. Avannaata Kommuniata taamatut oqarnera Ombudsmandip isumaqatigisorujussuuaa.

Ombudsmandip paasinninnera unaavoq piffissaq suliamik suliarinninnermut atorneqartoq pissutissaqanngitsumik sivisooq isorisariaqarlunnartorlu pineqartoq.

*Angajoqqaap angerlartitsiumalluni qinnuteqarneranit Avannaata Kommu-
niata suliami aalajangiinissaata tungaanut ukiut tallimat sinnerlugit inger-
lasimanagerat Ombudsmandip pingaartillugu ilaatigut isiginiarpaa.*

*Suliat angajoqqaat meeqqaminnik najugaqateqarnissaminnut periarfis-
saannut tunngasut immikkut pilertussuseqartumik suliarineqartariaqar-
nerat Ombudsmandip aammattaaq pingaartillugu isiginiarpaa. Piffissap
suliamik suliarinninnermut atorneqartup suliap ikinnerpaamik marloriarlu-
ni puigorneqartarsimanagera pissutigalugu sivitsorsarneqarujussuarsimane-
ra Ombudsmandip tamatuma saniatigut tunngaviutippaa.*

*Paasinnineq una Ombudsmandip tamatumunnga peqatigitillugu oqaati-
gaa, tassalu suliani angajoqqaatut oqartussaassutsimik tigummiqartup
meeqqami akuersisitsilluni inissinneqarsimasup angerlartinneqarnissaanik
qinnuteqarfigisaani qinnutigisaq akuerineqarsinnaanersoq kommunip sa-
paatit akunnerisa arlallit sivilunerpaamilluunniit qaammatialunnguit i-
ngerlaneranni isummerfigisariaqaraa.*

*Ombudsmandip tikkuarlugu oqaatigaa piffissaq suliamik suliarinninnermut
atorneqartoq sivilooq angajoqqaap inissiinermik Isumaginninnermi
Naammagittaalliuuteqartarfimmut naammagittaalliuutiginninnissaminut
mattunneqarsimanageranut ilaatigut pissutaasoq, Ombudsmandillu paasin-
ninnera unaavoq angajoqqaanik inatsiseqartitsinikkut innarlitsaalineq ta-
matuma aalajangiisuusumik sanngiillisikkaa.*

*Ombudsmandip suliamik suliarinninnermini Qaasuitsup Kommunia aam-
ma Avannaata Kommunia arlalinnik apeqquteqarfigai. Ombudsmandip ta-
matumunnga atatillugu oqaatigaa Avannaata Kommuniata apeqqutinut
taakkununnga akissuteqarnera naammaginangilluinnartuusoq.*

*Ombudsmandi suliami aalajangiisuusumik sunniuteqartunik kukkussute-
qartoqarsimallunilu sumiginnaasoqarsimasoq isumaqarami Inatsisartut I-*

natsisinut Ataatsimiititaliaat aamma Avannaata Kommunia tamatuminnga Ombudsmandi pillugu inatsimmi § 23 tunngavigalugu nalunaarfigai.

(Oqaaseqaat 29. juli 2019-imeersoq, j.nr. 2017-104-0055)

Suliami pineqartut kikkussusiisa ilisarnarunnaarsarneqarnerini taaguutit uku atorneqarput:

A: Naammagittaalliortoq, B-p angajoqqaava

B: Meeraq inissinneqartoq

Illoqarfik K: Illoqarfik A-p najugaqarfia B-llu inissinneqarfia

Paaqqinniffik I: Paaqqinniffik meeqqap B-p inissinneqarfia

Ombudsmandip oqaaseqaataa:

1. Suut misissorpakka?

Suliami A-p panimmi B-p angerlartinneqarnissaanik qinnutigisaanut tunngasumi piffissaq Qaasuitsup Kommuniata aamma Avannaata Kommuniata suliamik suliarinninnerminnut atugaat misissuininni pineqarpoq.

Avannaatali Kommuniata B pillugu aalajangiineri isumaqatiginerlugit isummerfiginngilara. Taamaalillunga B angerlarsimaffiup avataanut inissinneqassanersoq angerlartinneqassanersorluunniit isummerfiginngilara. Kommunip suliamik allatigut suliarinninnera aamma isummerfiginngilara, matumani suliami illua'tungiusup isumaanik tusarniaaneq, tunngavilersuineq allattuisussaaitaanerluunniit ilanngullugit eqqarsaatigalugit.

Uanga paasinninnera unaavoq suliaq angerlartitsiniarnermut tunngasoq A-p angerlartitsiumalluni 2013-imi augustimi siullermik qinnuteqarneranit Avannaata Kommuniata angerlartitsiniarneq itigartinneqassasoq 2018-imi decemberimi aalajangiinerata tungaanut suliarineqarsimasoq.

Oqaaseqaatiga Qaasuitsup Kommuniata 1. januar 2018-imi avinneqarsimanagera pissutigalugu Avannaata Kommunianut ingerlatinneqarpoq. Piffissarli kommunini marlunni taakkunani suliamik suliarinninnermut atorneqartoq tamarmiusoq tulliuttuni isummerfigaara.

Kommunini suliassa qarfiit aqqissuuteqqinneqarnerisa allanngortinneqarnerannik Inatsisartut inatsisaanni nr. 30-mi, 28. november 2016-imeersumi § 19, imm. 1 innersuussutigaa, tassuunalu aalajangersarneqarpoq pissusaaffiit pisinnaatitaaffiillu aamma pisassarisat akiligassallu kommunit nutaat marluk Qaasuitsup Kommunianit 1. januar 2018-imi tigussagaat. Aalajangersagaq taanna pillugu oqaaseqaatinit aammattaq erserpoq kommunalbestyrelsit nutaat oqartussaasunik namminersortunillu kommunalbestyrelsusimasup suleqateqarneranik ataatsimut isigalugu ingerlatsilissasut.

Suliami siusinnerusukkut suliarisanni piffissamut suliamik suliarinninnermut atorneqartumut tunngasuni Qaasuitsup Kommuniata avinneqarnera sioqqullugu tamatumalu kingornatigut suliarineqartumi paasinnineq tamatuma pissuseqataa oqaatigaara. Suliami 2018-3-mi nittartakkanni atuarneqarsinnaasumi imm. 1.2 innersuussutigaa.

Piffissaq suliamik suliarinninnermut atorneqartoq pillugu isumminnginninni suliaq qanoq iliorlunga misissorneriga sukumiinerusumik nassuiarpara (imm. 2-mi). Avannaata Kommuniata suliaq pillugu apeqqutinnut akissuteqartarnermi periaasia tamatumunnga atatillugu aamma isummerfigaara.

Suliap pingarnerusutigut ingerlasimanera (imm. 3-mi), suliap inatsiseqartitsinikkut tunuliaqutaa (imm. 4-mi), kommunip oqaaseqaatai (imm. 5-imi) aamma piffissaq suliamik suliarinninnermut atorneqartoq pillugu naliliininnik (imm. 6-imi) paasinninnera pillugit tamatuma kingornatigut nassuiaateqarpunga. Naggasiutaasumik oqaaseqaatikka tamatuma kingornatigut (imm. 7-imi) saqqummiuppakka.

Suliap ingerlasimanera oqaaseqaatima kingornatigut sukumiisumik allaase-raara.

2. Suliamik uanga misissuina

2.1. Suliaq ingerlasimanera pillugu Qaasuitsup Kommunianik aamma Avannaata Kommunianik allaffigeqatiginnittarnera

2.1.1. Qaasuitsup Kommunia A-p naammagittaalliuutaa tigoreerlugu allakkatigut 24. juli 2017-imeersutigut qinnuigaara suliami allagaatit aamma piffissaq suliamik suliarinninnermut atorneqartoq pillugu oqaaseqaat uannut nassiuteqqullugit.

Paasissutissat taakku kommunip allagaasigut 6. oktober 2017-imeersutigut tiguakka. Suliali ingerlasimanera tamarmiusoq paasiuminaatsippara. Taamaallungu piffissat arlallit suliaq suliarineqarfigisimasaatut paasisaraluakka eqqarsaatigalugit paasissutissanik ikittuinnarnik tigusaqarpunga allallu eqqarsaatigalugit paasissutissanik tigusaqanngitsuillunga.

Taamaattumik sulisuma ilaata Avannaata Kommunia suliaq pillugu arlalinnik apeqquteqarfiginiarlugu sianerfigaa. Kommunip oqarasuaatikkut 5. april 2018-imi oqaatigaa suliami allagaatit tamaasa Ombudsmandeqarfimmut nassiunneqarsimasut.

Avannaata Kommunia 13. juli 2018-imi qinnuigaara oqaaseqaammik uannut nassiusseqqeqqullugu. Suliamik paasinneqqaarnera kommunimut allakkanni eqikkarlugu saqqummiuppara – matumani suliaq 2013-imi aasakkulli suliarineqalersimanera ilanngullugu eqqarsaatigalugu. Kommuni qinnuigaara uanga paasinninnera isumaqatiginerlugu nalunaarutigeqqullugu, taamatuttaarlu suliaq pillugu arlalinnik apeqquteqaqqillunga. Kommuni tamatuma sania-tigut ilaatigut qinnuigaara suliami iliuuserineqarsimasut tamarmik ulluisa allattorsimaffiat kiisalu suliami allagaatit suliami allagaatinik uannut Qaasuitsup Kommunianit 2017-imi nassiussinerup kingornatigut suliamut ikineqarsimasinnaasut uannut nassiuteqqullugit. Allakkat taakku oqaaseqaatima kingornatigut suliaq ingerlasimanerata allaaserineqarnerani issuarneqarput.

2.1.2. Suliaq pillugu oqaaseqaatit pingasut Avannaata Kommunionit tamatum kingornatigut tiguakka. Oqaaseqaatilli taakkua arlaannaalluunniit Avannaata Kommuniata suliap ingerlasimanera tamarmiusoq pillugu isumaanik imaqaangilaq – suliap ingerlasimanera tamarmiusoq kommunip isumaqatigigaa oqarnermik imaluunniit pisut ulluisa allattorsimaffiannik.

Avannaata Kommuniata e-mailikkut 25. september 2018-imi siullermeerluni akivaanga. Oqaaseqaat taanna A aamma B pillugit paasissutissanik assigiingitsunik imaqarpoq, uangalu paasinninnera unaavoq oqaaseqaat taanna suliaq pillugu apeqqutigisama arlaannaannulluunniit akissummik imaqaangitsoq, taamatuttaarlu pisut ulluisa allattorsimaffianik imaqarani. Taamaatumik kommuni suliaq pillugu oqaaseqaateqaqqullugu aqaguani qinnuigeqqippara.

Oqaaseqaat nutaaq Avannaata Kommuniata uannut e-mailikkut 4. januar 2019-imeersukkut nassiuppaa. Oqaaseqaat taanna imatut paasivara piffisap kommunimi suliamik suliarinninnermut atorneqartup taama sivilutigineranut manna pissutaasoq, tassalu B-p Kalaallit Nunaanni peqqinnissaqarfimmit ukioq ataaseq qaangiuttoq misissorneqarnera pillugu paasissutissat kommunimit aatsaat 2018-imi novemberimi tiguneqarsimanagerat. Suliali ingerlasimanera tamarmiusoq qanoq issimangersoq kommunip isummerfigisimanngilaa, taamatuttaarlu pisut ulluisa allattorsimaffiat kommunip uannut nassiunnagu.

Taamaatumik sulisuma ilaasa marluk Avannaata Kommuniata suliaq pillugu 7. februar 2019-imi ataatsimeeqatigaat. Sulisuma taakkua paasissutissat suut allakkakkut 13. juli 2018-imeersutigut qinnutigisimagikka ataatsimiinnermi tassani sukumiinerusumik nassuiarpaat. Avannaata Kommuniata tamanna pillugu ilaatigut oqaatigaa suliami siusinnerusukkut aalajangiisoqarsimagunartoq. Suliaq kommunip misissorniarpaa, tamatumalu kingornatigut akissuteqarniarluni.

Oqaaseqaatit pingajuat allakkatigut 13. marts 2019-imeersutigut Avannaata Kommunionit tiguara. Tassannga ilaatigut erserpoq suliami B-p angerlartin-

neqarnissaa pillugu siusinnerusukkut kommunip 7. februar 2019-imi oqaatigisaraluartut aalajangiisoqarsimangitsoq. Oqaaseqaalli taanna suliap ingerlasimanera tamarmiusoq pillugu apeqqutigisannut akissutinik pisulluunniit ulluisa allartorsimaffiannik aamma imaqaangilaq. B-p inunnik innarluutilinik ikiorsiisarneq pillugu malittarisassat tunngavigalugit tapersorsorneqarnissaa pillugu kommunip suliaataani ingerlasumi allagaatit kommunip allaganut ilanngullugit nassiunneqarput. Oqaaseqaatit pingasut taakku suliap ingerlasimanera pillugu allaaserisanni oqaaseqaatinnut uiggiussami issuarneqarput.

Sulisuma ilaat Avannaata Kommunianut 3. april 2019-imi sianerpoq, suliaq pillugu arlalinnik apeqquteqarniarluni. Kommunimi sulisup uanga sulisunnut oqaatigaa suliami siusinnerusukkut aalajangiisoqarsimangitsoq, suliami piffissaq 2015-2016 sioqqullugu allakkianik peqarpiangitsoq taamaattumillu suliami qanoq pisoqarsimanera takujuminaatsoq.

2.2. Avannaata Kommuniata suliaq pillugu apeqqutinnut akissuteqaateqarneranik uanga naliliinera

Ombudsmandip suliaq pillugu paasissutissanik oqartussaasunit piumasaqarsinnaatitaanera Ombudsmandi pillugu inatsimmi § 18, imm. 2-kkut aalajangersaavigineqarpoq. Tassuuna aalajangersarneqarpoq Ombudsmandip oqartussaasut il.il. sulinermini pineqartunut ilaatinneqartut allakkatigut oqaaseqaateqaqqullugit piumasaqarfigisinnaagai.

Aalajangersagaq taanna pillugu oqaaseqaatinit ilaatigut makku erserput:

“Aalajangersakkakut siunertarineqarpoq Ombudsmandip paasissutissanik paasiniaasinnaatitaanermi paasissutissaannavinnik paasiniaanermi uppersaatisanillu oqartussaaffiup pigisaanik pissarsiniarnermini killiliivigineqannginnissaa, aammattaarli piumasarisinnaallugu oqartussaasoq periaatsimut, oqartussaasup susasaqarfimmini atortagaanut, tunngaviusutut aamma/imaluunniit tamanut tunngasumik pissuseqarnerusumut inatsisitigullu paasinnittaatsimik tunuliaqu-taasumut nassuiaammik saqqummiussinissaa.”

Suliaq pillugu oqaaseqaatit pingasut taakku Avannaata Kommunanit tigusakka suliap ingerlasimanera pillugu allaaserisannut isummerfiginninnermik pisulluunniit ulluisa allattorsimaffiannik kommunimut allakkakkut 13. juli 2018-imeersutigut qinnutigisaraluannik imaqaanngillat.

Suliaq piffissami 2015-2016-ip missaata tungaanut ingerlasimanerata allaaseriniarneranik kommunip ajornartorsiuteqarneranik Avannaata Kommuniata oqarasuaatikku paasissutissiisimanera eqqumaffigaara. Oqaatigaarali piffissaq taanna pillugu apeqqutikka kommunip akisinnaanngippagit isumaqartunga tamanna kommunip oqaaseqaatini erseqqilluinnartumik nassuiarsimasariaqaraluaraa. Aammattaaq oqaatigaara uanga paasinninnera unaasoq suliap piffissami tamatuma kingornatigut ingerlasumi ingerlasimaneranik kommunip naatsuararsuarmik nassuiaataa apeqqutinnut aamma akissuteqaataanngitsoq.

Avannaata Kommuniata suliaq pillugu apeqqutinnut akissuteqarnera ataatsimut isiginnillunga naammaginangilluinnartutut isigaara.

Avannaatali Kommuniata suliap ingerlasimanera tamarmiusoq pillugu paasissutisseeqqullugu qinnuigeqqinnissaa siunertaqaanngitsutut isigisariaqarpara. Piffissap suliamik uanga suliarinninninnut atorpeqartup sivilissusiata eqqarsaatigineqarnissaa tamatumunnga atatillugu pingaartillugu aamma isiginiarpara.

Taamaalillunga paasissutissat Qaasuitsup Kommunanit aamma Avannaata Kommunanit tigusakka tunngavigalugit oqaatigisariaqarpara suliamik suliarinninnermi iliuuserineqarsimasut tamaasa pillugit paasissutissanik immikkuualuttulersugaasunik/sukumiisunik peqaanngitsunga. Isumaqarpungali suliap ingerlasimanerata tamarmiusup qanoq sivilutiginera suliarlu pisariaqarneratut pilertortigisumik suliarineqarsimansoq isummerfigisinnaagikka.

3. Uanga suliap pingaarnerusutigut ingerlasimaneranik paasinnin- nera

B angerlarsimaffiup avataanut 2011-mi inissinneqarpoq.

Tamanna imatut paasivara B ilaqutariinni paarsassanngortillugu angajoqqaatut oqartussaassusermik tigummiaraqtoq akuersitinnagu inissinneqassasoq Qaasuitsup Kommunian 2011-mi novemberimi aalajangiisimasoq.

Aammattaaq imatut paasivara B Paaqqinniffimmut I-imut illoqarfimmi K-miittumut 2011-mi novemberimi nuutsinneqarsimasoq, Qaasuitsullu Kommunian 2012-imi aprilimi aalajangiisimasoq ulloq unnuarlu paaqqinniffimmut akuersisitsilluni inissiisarneq pillugu malittarisassat tunngavigalugit inissinneqassasoq. Oqaatigaara akuersinermut uppernarsaat suliami allagaatini Qaasuitsup Kommunianit tigusanni ilaanngitsoq, suliamilli suliarinninninni tunngaviuttippara B akuersisitsilluni inissinneqarsimasoq, B angerlartinneqassasoq A kingusinnerusukkut qinnuteqarmat.

Oqaatigaara suliami allagaatinit ersertoq B angerlarsimaffiup avataanut inissinneqarsimagaluarluni A-p illoqarfimmi K-mi najugaqarfiani piffissani arlallinni najugaqartarsimasoq. Qasseriarlunili imaluunniit qanorpiaq sivistutigisumi A-mi najugaqartarsimanersoq paasissutissat pissarsiarisimasakka aallavigalugit takusinnaanngilara.

B-p angerlartinneqarnissaa A-p Qaasuitsup Kommunianut allakkatigut 29. juli 2013-imeersutigut qinnutigaa. Kommunip allakkat taakku 5. august 2013-imi tigusimavai.

Uanga paasinninnera unaavoq Qaasuitsup Kommunian A-p saaffiginnissutaa siulleq tunngavigalugu suliamik suliarinninnermi iliuseqarsimanngitsoq. Taamaalilluni suliami allagaatinik 2013-imeersunik allanik peqanngilaq.

B-p angerlartinneqarnissaa A-p Qaasuitsup Kommunianut allakkatigut 30. januar 2014-imeersutigut qinnutigeqqippaa.

Imatut paasivara suliaq Qaasuitsup Kommuniata tamatuma kingornatigut aatsaat suliarilersimagaa. Taamaalillutik allakkiat marluk kommunip suliaa-taanut 2. februar 2014-imi ilanngunneqarsimapput. Taakkunannga erserpoq A-p qinnutigisaa kommunip tigusimagaa, killiffillu pillugu nalunaarusiaq aamma ukiup affakkaartumik nalunaarusiaq Paaqqinniffimmit I-imit pissar-siariniarneqassasut. Aammattaaq erserpoq A, B Paaqqinniffim-milu I-imi at-taveqarfiusartoq ataatsimiigiaqquneqassasut, iliuusissanut pilersaarut sulia-rineqarsinnaaniassammat.

Paasissutissat kommunip Paaqqinniffimmit I-imit 23. juni 2014-imi tiguai, B-lu pillugu iliuusissanut pilersaarut A-p 18. december 2014-imi atsiorpaa. Iliuusissanut pilersaarummit ilaatigut erserpoq "B angerlassappat pissutsit ataataasup qatanngutaasalu ilaqutariinni atugaat misissorneqaqqaartaria-qarput, B angerlassanersoq naliliinissaq siunertaralugu".

Imatut paasivara Qaasuitsup Kommuniata suliamik suliarinninnera tamatu-ma kingornatigut uneqqissimasoq. Taamaalilluni Avannaata Kommuniata sulisuma ilaannik oqarasuaatikkut 5. april 2018-imi oqaloqateqarnerani o-qaatigineqarpoq piffissami tassani sulisut paarlagaassimasorujussuusut, taamaattumillu suliaq puigorneqarsimasoq. Kommunip aamma oqaatigaa 2013-imi imaluunniit 2014-imi aalajangiisoqarsimanersoq suliami takune-qarsinnaanngitsoq. Oqaatigaara suliami 2016 sioqqullugu annertuunik arla-linnik iliuuseqartoqarsimanersoq suliami allagaatini kommunimit tigusanni takusinnaanngikkiga.

B-p angerlartinneqarnissaa A-p Qaasuitsup Kommunianut allakkatigut 10. august 2016-imeersutigut qinnutigeqqippaa.

Allakkiamit 10. oktober 2016-imeersumit erserpoq Qaasuitsup Kommuniata A aamma B suliaq pillugu ulloq taanna ataatsimeeqatigisimagai. B-p ataata-mini najugaqarusunnini ataatsimiinnermi oqaatigaa. Allakkiamit aamma-taaq erserpoq Dronning Ingridip Napparsimmavissuanit paasissutissat arlal-lit kommunip amigaatigigai, B-llu peqqissusia pillugu paasissutissat amerla-

nerusut pissarsiariniarneqassasut – uanga paasisattut illoqarfimmi K-mi peqqissaavimmit. Aammattaaq erserpoq A, sinniisoq Paaqqinniffimmit I-imeersoq kommunimilu innarluutilinnik sullissisoq peqatigalugit attaveqaqatigiittut ataatsimiinnermut tamatuma kingornatigut aggeqquneqarniarloq. Kiisalu allakkiamit erserpoq A aamma B ilisimatinneqarsimasut suliaq angerlartitsiniarnermut tunngasoq isumaginninnermi ataatsimiititaliap attaveqaqatigiittut ataatsimiinnerup kingornatigut isummerfiginiaraa.

Imatut paasivara Qaasuitsup Kommuniata aamma Avannaata Kommuniata B-p peqqissusia pillugu paasisutissat arlallit taamanimiilli pissarsiariniartarsimagai, kommunilli taakkua peqqinnissaqarfimmik attaveqarfiginnittarsimanerat suliami tamakkiisuunngitsumik uppersarsaasorsorneqarsimasoq. Taamaattumik susoqarpiarsimanagera paasiuminaatsippara. Imatut paasivara suliap angerlartitsiniarnermut tunngasup saniatigut B inunnik innarluutilinnik ikiorsiisarneq pillugu malittarisassani pineqartunut ilaatinneqarsinnaanersoq pillugu suliaq ingerlasimasoq, peqqinnissaqarfimmillu allaffigeqatiginnittarsimanerme allagaasimasut suliami allagaatinut ilaasut ilaanni apequt taanna pineqartoq.

Suliamili allagaatinit erserpoq Qaasuitsup Kommunianut “suliamik meeqqamut tunngasumik misissuinnermut atatillugu oqaaseqaat” tarnip nakorsaata illoqarfiup K-p peqqissaaviani 24. november 2016-imi suliarisimagaa. Oqaaseqaammit erserpoq taanna kommunip “pisoq pillugu nakorsap oqaaseqaataa” pillugu apeqquteqaataa tunngavigalugu suliarineqarsimasoq. Oqaaseqaammit aamma erserpoq nakorsaq naliliisoq B tarnip pissusiinut tunngasutigit sukumiisumik misissorneqartariaqartoq, taamaalilluni nukissaqarfigisai ajornartorsiutaalu qulaajarneqarsinnaaqqullugit. Nakorsap aammattaaq oqaatigaa “allamut nuutsinneqannginnerani sutigit ikiorneqarnissamik neqerorfigineqartariaqarneranik apeqqummi eqqarsarluaqqissaartoqartariaqartoq. [...] Taarsiussassaq – ataataminiinnissaa – piviusorsioortutut isigineqanngilaq, [...]”.

Qaasuitsup Kommuniata uannut oqaaseqaataa 6. oktober 2017-imeersoq imatut paasivara kommuni tamatuma kingornatigut naliliisoq kommuni sulia-

mi aalajangiisinnaanngitsoq, B-p taamatut tarnip pissusiinut tunngasutigut misissorneqarnera pillugu paasissutissat kommunimit tiguneqareertinnagit. Oqaaseqaammit aammattaaq erserpoq misissuineq taamaattoq 2017-imi junimi pisussaasimagaluartoq, qaammalli taanna Nuugaatsiami Illorsuarnilu tassaarsuaqarnera pissutigalugu kinguartinneqarsimasoq.

B tarnip pissusiinik ilisimasalimmit 23. november 2017-imi misissorneqarpoq. Suliami allagaatini ilaavoq Kalaallit Nunaanni peqqinnissaqarfiup suliaataani allattuiffik, tarnillu pissusiinik ilisimasallip tassani ilaatigut oqaatigaa "ulloq unnuarlu ingerlasumik isumaginninnermi perorsaanikkut anner-tuumik 18-iliinerata kingornatigut ingerlaqqittariaqartumik suli pisariaqartit-sisoqartoq naliliisoqartoq".

Avannaata Kommuniata Ombudsmandeqarfimmik 7. februar 2019-imi aataatsimeeqateqarnermini oqaatigaa tarnip pissusiinik ilisimasallip misissu-nera pillugu paasisat kommunip nukingisaarutigisimagai, kommunilli peq-qinnissaqarfik arlaleriarluni nukingisaartareersimagaluarlugu suliami allat-tuiffik Paaqqinniffimmit I-imit aatsaat 2018-imi novemberimi tigusimagaa.

Qulaani oqaatigineqartutut kommunip peqqinnissaqarfimmik suliaq pillugu attaveqarfiginnittarsimanerminik uppernarsaasersuina annikitsuararsu-
soq takuneqarsinnaavoq, taamaalillunilu suliami allattuiffik 2017-imi no-
vemberimeersoq pissarsiariniarlugu Avannaata Kommuniata iliuuseqarsima-
nera pillugu allagaatinik peqanngilaq.

Suliamili allagaatinit aamma erserpoq A-p saaffiginnissutaa 10. august 2016-imeersoq puigorneqarsimasoq. Taamaalilluni suliap angerlartitsiner-
mut tunngasup 2018-imi decemberimi suliarineqarneranut atatillugu isuma-
ginninnermi ataatsimiititaliamut inassuteqaammit erserpoq "allakkat 10. au-
gust 2016-imeersut [...] ajoraluartumik suliarineqarsimasorinangillat,
sularinninnerlu massakkut aallartilluni". Allakkiami 15. november 2018-i-
meersumi tamatuma pissuseqataa aamma tunngaviutinneqarsimasorinar-
poq.

Avannaata Kommunia suliami 2018-imi decemberimi aalajangiivoq. Suliami allagaatini ilaapput allakkat marluk assilineri, taakkulu Avannaata Kommunanit A-mut 5. aamma 6. december 2018-imi nassiunneqarsimasutut paa-sisariaqarpakka. Allakkanit marlunnit taakkunannga erserpoq B angerlartin-neqarsinnaanngitsoq kommuni aalajangiisimasoq. Kommunip allakkani 5. december 2018-imeersuni ilaatigut oqaatigaa "tarnip pissusiinik ilisimasallip inaarutaasumik naliliinera" pingaartillugu isiginiarneqarsimasoq.

4. Malittarisassatigut tunngavigisaq

4.1. Inissiisarneq angerlartitsisarnerlu pillugit malittarisassat

4.1.1. Meeqqanik inuusuttunillu angerlarsimaffiup avataanut inissiisarneq piffissami B-p inissinneqarnerata nalaani meeqqanik inuusuttunillu ikiorsii-sarneq pillugu Inatsisartut peqqussutaatigut nr. 1-ikkut, 15. april 2003-meersukkut kingusinnerusukkut allannguuteqartinneqartukkut (matuma kingornatigut meeqqat pillugit peqqussummik taaneqartartussakkut) aalajangersaavigineqarpoq. Meeqqat pillugit peqqussut meeqqat tapersersorneqarnissaat pillugu Inatsisartut inatsisaannit nr. 20-mit, 26. juni 2017-imeersumit (matuma kingornatigut meeqqat tapersersorneqartarnerat pillugu inatsimmik taaneqartartussamit) 1. juli 2017-imi taarserneqarpoq.

Meeraq angajoqqaatut oqartussaassutsimik tigummiqartumik akuersisitsil-luni akuersisitsinaniluunniit ulloq unnuarlu paaqqinniffimmi inissinneqassa-soq kommuni aalajangiisinnaavoq. Tamanna massakut meeqqanik taperser-suisarneq pillugu inatsimmi § 27, imm. 1-ikkut, § 28, imm. 1-ikkut aamma § 30, imm. 2-kkut aalajangersarneqarpoq, 1. juli 2017-ilu sioqqullugu meeqqat pillugit peqqussummi § 9, imm. 2, nr. 10-mi aamma § 10-mi malittarisassatigut siuliani taaneqartunut assingusutigut aalajangersarneqar-poq.

Angerlarsimaffiup avataanut inissiineq inissiinerup siunertani anguppagu, inissiinerup siunertani eqqortikkunnaarpagu imaluunniit inuusuttoq 18-inik ukioqalerpat unitsinneqassaaq. Tamanna massakut meeqqanik taperser-

suisarnej pillugu inatsimmi § 40, imm. 1-ikkut aamma 2-kkut aalajangersarnejarpoq, 1. juli 2017-ilu sioqqullugu meeqqat pillugit peqqussummi § 27, imm. 1-imi aamma 2-mi malittarisassatigut siuliani taaneqartunut assingusutigut aalajangersarnejarpoq.

4.1.2. Meeqqap angerlartinneqarnissaa kissaatigigini meeqqamut angerlarsimaffiup avataanut inissinneqartumut angajoqqaatut oqartussaassutsimik tigummiartup kommunimut nalunaarutigippagu qinnutigisaa akuersarneqarsinnaanersoq kommunip isummerfigissavaa.

Pissutsit arlallit angerlarsimaffiup avataanut inissiineq unitsinneqassasoq kommunip aalajangiisinnaalinnginnerani misissorneqartussat pillugit inatsikkut aalajangersaasoqarsimavoq. Meeraq soorlu ulloq unnuarlu paaqqinniffimmi inissinneqarsimappat paaqqinniffik taanna kommunip oqaaseqaateqartissavaa. Tamanna massakut meeqqanik tapersersuisarnej pillugu inatsimmi § 41, imm. 1, nr. 3-kkut aalajangersarnejarpoq, 1. juli 2017-ilu sioqqullugu meeqqat pillugit peqqussummi § 28, imm. 2-kkut aalajangersarnejarsimalluni.

Tamatuma saniatigut malittarisassatigut massakut atuuttutigut aalajangersarnejarpoq angerlartitsisoqarnissaanik aalajangiisinnaalinnginnermi pissutsit amerlanerusut allat kommunip misissussagai, matumani angajoqqaatut oqartussaassutsimik tigummiartuq meeqqap pisariaqartitaanik (pisariaqarpat meeqqanik tapersersuisarnej pillugu inatsit tunngavigalugu tapersersuiniuteqarnikkut) tunniussisinnaanersoq pillugu paasissutissat ilanngulugit eqqarsaatigalugit. Meeraq aammattaaq oqaloqatigineqassaaq. Tamanna meeqqanik tapersersuisarnej pillugu inatsimmi § 41, imm. 1, nr. 1-ikkut 2-kkullu aalajangersarnejarpoq, tak. § 43. Meeqqat pillugit peqqussummi taakkua pissuseqataannik aalajangersagaqanngilaq.

Misissuineq kommunip ingerlatassaa meeqqanik tapersersuisarnej pillugu inatsit pillugu oqaaseqaatini itisilerisumik allaaserineqarpoq. § 41, imm. 1, nr. 1 pillugu oqaaseqaatinit ilaatigut makku erserput:

“Meeqqap angerlarsimaffiup avataanut inissinneqartariaqarneranut taamanikkut atukkat tunngavilersuutigineqartut ilaqutariinni aaqinneqarsimanersut [kommunalbestyrelsip] misissuinermi aallaavigisariaqarpaa. Sioqqutsisumik misissuinerup tamatuma ilaatut angajoqqaatut oqartussaassusilinni pissutsit maannakkullu angajoqqaatut piginnaassusaat isummerfigineqartariaqarput. Angajoqqaat asser-suutigalugu imigassamik atornerluisuusimappata, angajoqqaat maannakkut atornerluinermiit aniguisimanersut misissuiffigineqassaaq. Angajoqqaatut oqartussaassusilinni pissutsinik il.il. misissuinermi, angajoqqaat maannakkut isumassuisinnaassusiat, isumannaatsuunerat, misigissutsitigut kialaassusiat, meeqqanik innerikkiartortitsisinnaassusiat, ilitersuisinnaassusiat, killiliisinnaassusiat, allanngujaassusiat il.il. aamma ilanngunneqartariaqarput. Angajoqqaatut oqartussaassusillit allanik meeraqarsinnaanerat pillugu paasissutissat meeqqallu taakku alliarturnerat angajoqqaaminnullu attaveqarnerat, angajoqqaatut oqartussaassusilinni pissutsit nalilersornerannut ilaasussatut naatsorsuutigisariaqarpoq.”

Aalajangersagaq taanna matumunnga ataneqartillugu isigineqartariaqarpoq, tassalu paasissutissat suliap eqqortumik aalajangiivigineqarnissaanut pisariaqartut pissarsiarineqarnissaat oqartussaasup isumagissagaa ingerlatsineq pillugu inatsiseqartitsinermi tunngavik nalinginnaasoq atuuttoq. Tunngavimmi tassani oqartussaasut paasissutissanik eqqortumik aalajangiinissamut pisariaqartunik pissarsinermikkut naammattunik tunngavissaqarnissaat pineqarpoq (officialprincippet imaluunniit officialmaksimen). Tunngaviup taassuma isumaa unaavoq misissuineq sapinngisamik pilertornerpaamik naleqqunnerpaamillu ingerlanneqassasoq – eqqortumik aalajangiinissaq anguniarlugu naammaqqissaartumik sivisussusilimmik. Tassa imaappoq suliamik paasissutissartalersuineq paasissutissanik suliap aalajangiivigineqarneranut pingaaruteqanngitsunik pissarsiniarnikkut sivitsorsarneqassanngitsoq.

Tunngavimmik taassuminnga allaaserinnineq Kalaallit Nunaanni Namminersornerullutik Oqartussat “Suliassat suliarineqartarnerat pillugu inatsit pillugu ilitersuutaat”-ni (matuma kingornatigut suliassat suliarineqartarnerat pillugu inatsit pillugu ilitersuummik taaneqartartussami) 1994-imi saqqummersinneqartumi immikkoortumi 198-imi atuarneqarsinnaasoq innersuussutigaa.

Uanga paasinninnera unaavoq suliassaqarfimmi tassani inatsiseqartitsinikut tunngavik Kalaallit Nunaanni aamma Danmarkimi pingaarnerusutigut assigiittoq. Taamaattumik Niels Fengerip allallu atuakkiaanni "Forvaltningsret"-imi (2018-imeersumi) quppernerit 484 tulliilu taamatuttaaq innersuusutigaakka.

4.1.3. Meeraq angerlartinneqassasoq imaluunniit meeraq angerlarsimaffiup avataani inissisimaannassasoq kommunip suliaq misissoreerlugu aalajangersinnaavaa – pisariaqarpat nutaamik tunngaveqarluni.

Meeraq angajoqqaatut oqartussaassutsimik tigummiaqartumik akuersisitsiluni inisseqqaarneqarsimappat, meerarlu angerlartinneqarsinnaanngitsoq kommuni naliliippat, meeqqap angerlarsimaffiup avataani inissinneqarnera kommunip aalajangiusimasinnaavaa, tamatumunnga piumasaqaatit eqqortinneqarsimappata inissiineq akuersisitsinani inissiinertut ingerlaqqissasoq aalajangiinermigut.

Meeraq angajoqqaatut oqartussaassutsimik tigummiaqartoq akuersitinnagu inissinneqaaqarsimappat inissiinerup allanngortinnissaanut tunngavissaqanngitsoq kommuni soorunalimi aamma aalajangiisinnaavoq.

Kommunalbestyrelsi siusinnerusukkut aammattaaq aalajangiisinnaavoq angerlarsimaffiup avataani inissiineq unitsinneqassanngitsoq, angerlartitsineq meeqqap pisariaqartitaanut akerliuppat. Tamanna atuuttarpoq inissiinerup angajoqqaatut oqartussaassutsimik tigummiaqartoq akuersitillugu akuersitinnaguluunniit pisimanagera apeqqutaatinnagu. Tamanna meeqqat pillugit peqqussummi § 29-kkut aalajangersarneqarpoq. Meeqqanik tapersuisarneq pillugu inatsit aalajangersakkamik taassuma pissuseqataanik imaqanngilaq.

"Meeqqanik inuusuttunillu ikiorsiisarneq pillugu ilitsersuut" taamani Ilaqutariinnermut Pisortaqarfiusup suliarisimasaani imm. 14.6-imi tamatumunnga allaaserinnineq innersuussutigaara.

Isumaginninnermik Aqutsisoqarfiup meeqqat tapersersorneqarnissaat pillugu Namminersorlutik Oqartussat nalunaarutaat nr. 16, 8. november 2017-imeersoq pillugu ilitersuusuaata kalaallisuuani quppernermi 103-mi tulliini lu aamma qallunaatuani quppernemi 99-imi tulliini lu meeqqanik inissinneqarsimasunik angerlartitsinnermut atatillugu suliap ingerlasarneranik allaaserisaa aammattaaq innersuussutigaa.

4.2. Piffissaq sulianik suliarinninnermut atorneqartartoq pillugu malittarisassat

Meeqqap angerlarsimaffimmi avataanut inissinneqarsimasup angerlartinneqarnissaa angajoqqaatut oqartussaassutsumik tigummiartup qinnutigippagu kommuni qanoq pilertortigisumik aalajangiissasoq immikkut piffissalius-sanik meeqqat pillugit peqqussummi aalajangersaasoqarsimanngilaq. Meeqqanik tapersersuisarneq pillugu inatsimmi massakkut atuuttumi aamma taamaappoq.

Oqartussaasut piffissaq sulianik suliarinninnerminnut atortagaat pillugu ataatsimut malittarisassanik, suliassat suliarineqartarnerat pillugu inatsimmi inatsisiniluunniit allani aammattaaq aalajangersaasoqarsimanngilaq.

Nalinginnaasumilli ilimagineqarpoq suliart sapinngisamik pilertornerpaamik illersorneqarsinnaasumillu suliarineqartassasut ingerlatsinnermi ileqqorissarnerup nassatarigaa.

Suliani siusinnerusukkut suliarisanni arlalinni – soorlu suliami 2009-mi ukiumoortumik nalunaarutinni imm. 5-7-2-tut ilanngunneqartumi – piffissaq ingerlatsiviup sulianik suliarinnittarnerminut atortagaa pillugu piumasaqaat suliassat suliarineqartarnerat pillugu inatsit pillugu ilitersuummiittoq ilaati-gut innersuussutigisarpara. Iltersuummi ilaatigut imaattunik allassimasoqarpoq:

“**199.** Suliassat tamarmik pisortat ingerlatsiviini suliarineqartut soorunami sapinngisamik pisariitsumik, pilertortumik aningaasartuutaavallaanngitsumillu suliar-

neqartarnissaannik piumasaqaat pingaartumik atuuppoq suliassanut inuit ataasiakkaat imaluunniit namminersorlutik ingerlatseqatigiiffiit, suliffeqarfiit, peqatigiiffiit il.il. attuumassuteqarfigisaanni.

[...]

204. Suliassat suliarineqartarnerat pillugu inatsit suliassat qanoq sivisutigisumik suliarineqartarnissaat pillugu nalinginnaasunik aalajangersagartaqanngilaq. Tamatumunnga ilaatigut pissutaavoq suliassat pisortat ingerlatsiviinit suliarineqartartut assigiinneqimmata assigiinneqisunillu annertussuseqartarlutik, taamaatumik inatsisikkut pisortat ingerlatsiviini qanoq sivisutigisumik suliarineqartarnissaasa aalajangersimasumik malittarisassiornissaat ajornarluinnartussaalluni, tassa eqqartuussivinni ajornarpallaanngitsumik atortinniarneqarsinnaasunik.

Kisiannili Folketingip Ombudsmandiata oqaaseqaatigisartagai tunngavigalugit nalinginnaasumik ingerlatsinermi ileqqorissaarnerup malinniarneqarnissaani suliassat qanoq sivisutigisumik suliarinarneqartarnissaat pillugu malittarisassaqaartitsisoqarpoq, matuma ataani suliamut tunngassuteqartup suliap qanoq sivisutigisumik suliarineqassangatinneqarneranik ilisimatinneqartarnissaa ilanngullugu.

Ombudsmandip aammattaaq aalajangikkat ilaanni tikkuaavigisarsimavaa suliat siviisuumik aalajangiivigineqaratik uninngatinneqartarnissaat pinaveersaarniarlugu kiisalu puigortoorneqarlutik aalajangiivigineqanngitsoortarnissaat pinaveersaarniarlugu oqartussaasut naammattumik *atorsinnaalluartunik suliat uterfigeqinneqartarnissaannut allattuiffiliortarnissaat.*"

Taamaalilluni piffissaq suliamik suliarinninnermut atorneqartoq suna naammaginartutut isigineqarsinnaanersoq ataatsimut akineqarsinnaanngilaq, sulianili ataasiakkaani pisumik naliliinermik tunngaveqartariaqarluni.

Oqartussaasup suliaq pisariaqarneratut pilertortigisumik suliarisimaneraa naliliinermi piffissap suliamik suliarinninnermut atorneqartup tamarmiusup saniatigut pissutsit allat aamma isiginiarneqartariaqarput, matumani suliami illua'tungiusup pilertortumik aalajangiisoqarnissaanik pisariaqartitsinerata soqutigisaqarneratalu, suliap pissusiata ajornakusuussusiatalu, oqartussaasup misissugassaata annertussusiisa piffissallu oqartussaasup suliani taa-

matut ittuni suliarinninnermut atortagaata isiginiarneqarnissaat ilanngullugit eqqarsaatigalugit.

Suliani arlalinni allani piffissaq oqartussaasup suliamik suliarinninnera pillugu oqaaseqaateqartarpunga. Suliat 2011-mi ukiumoortumik nalunaarutinni immikkoortumi 5.7.1.-imi kiisalu 2005-imi ukiumoortumik nalunaarutinni kalaallisuuani quppernemi 69-imi qallunaatuuanilu quppernermi 56-imi ilanngunneqartut ilaatigut innersuussutigaakka. Suliaq kingullertut taaneqartoq Ombudsmandeqarfimmi "qangaanerungaatsiarteq" periaatsimut innersuussutinik imaqarpoq. Suliaq 2018-3 nittartakkanni tamanut saqqummiunneqarsimasoq aammattaq innersuussutigaara.

Uanga paasinninnera unaavoq suliassaqarfimmi tassani inatsiseqartitsinikut tunngavik Kalaallit Nunaanni Danmarkimilu pingaernerusutigut assigiit-toq. Taamaattumik Danmarkimi inatsisilerineq pillugu atuakkiat piffissaq pi-sortani oqartussaasut sulianik suliarinninnerminnut atortagaat pillugu pi-masaqaatit allaaserineqarneranni naggasiutitut innersuussutigaakka, matu-mani ilaatigut Niels Fengerip allallu atuakkianni "Forvaltningsret"-imi (2018-imeersumi) quppernerit 688 tulliiilu aamma Hans Gammeltoft-Han-senip allallu atuakkianni "Forvaltningsret"-imi aappasaanik naqitertinne-qartumi (2002-meersumi) quppernerit 903 tullialu ilanngullugit eqqarsaati-galugit.

5. Qaasuitsup Kommuniata aamma Avannaata Kommuniata piffissaq suliamik suliarinninnermut atorineqartoq pillugu oqaaseqaataat

Qaasuitsup Kommuniat aamma Avannaata Kommuniat sulisunnik oqarasuaa-tikkut oqaloqatigiinnerni arlalinni, ataatsimiinnermi ataatsimi allakkatigullu oqaaseqaatini sisamami piffissaq kommunit taakkua suliamik suliarinninner-minnut atugaat pillugit nassuiaateqarput.

Taamaakkaluarteq suliap ingerlasimanera pillugu ataatsimut nassuiaammik tigusaqanngilanga – piffissallu suliamik suliarinninnermut atorineqartup ta-marmiusup sivilisussusia pillugu ataatsimut nassuiaammik aamma tigusaqar-

nanga. Kommunilli pissutsit suliap suliarineqarneranik sivitsorsaasut arlaleriarlutik uannut paasissutissiissutigisarpaat.

Taamaalilluni Qaasuitsup Kommunia oqaaseqaammi 6. oktober 2017-imeersumi ilaatigut imatut allappoq:

“B-p tarnip pissusiinik ilisimasalimmit sukumiisumik misissorneqarnissaa misissuinerullu taassuma illoqarfimmi K-mi peqqissaavimmi [...] naliliiffigineqarnissaa utaqqimaarneqartoq illoqarfimmi K-mi isumaginnittoqarfiup siusinnerusukkut paasissutissiissutigaa. Tarnip pissusiinik ilisimasallip misissuineru suli naammassineqanngilaq. Meeqqanut tarnip pissusiinik ilisimasallip/meeqqat taarnikkut nappaataannik ilisimasallip/nakorsap sap. ak. 25/2017-imi [19.-25. juni 2017 uanga ilanngussara] illoqarfimmi K-miinnissaa pilersaarutigineqarpoq, taannali Uummannap eqqaani tassaarsuaqarneratigut ajunaarneq pissutigalugu kinguartinnerarluni.

Tarnip pissusiinik ilisimasallip namminersortup illoqarfimmut K-mukartillugu B-mik misissuisinnaaneranut periarfissaqarnerisioq tamanna sioqqullugu upernaag misissorsimagaluarparput, tamannali unitsikkallarnerarpoq, tassami taamaalior-nissamut Peqqissaaviup meeqqanut tarnip pissusiinik ilisimasalimmik tikeraartorfissaraluata nalaani aatsaat periarfissaqarsimammat.

Illoqarfimmi K-mi isumaginnittoqarfik naliliivoq B angerlartitsisoqarsinnaanerata isummerfigineqannginnerani pitsaanerpaamik ikiorneqassappat nukittuffiisa qu-laajarneqarnissaat utaqqimaaqqaartariaqaripput.” (Ombudsmandeqarfimmi nutsigaavoq)

Avannaata Kommuniata tamatuma kingornatigut oqarasuaatikkut 5. april 2018-imi oqaloqatigiinnermi oqaatigaa piffissami 2013-2014-imi sulisut paarlagaattorujussuusimasut, taamaattumillu suliaq ajoraluartumik puigortoorneqarsimassasoq.

Avannaata Kommuniata oqaaseqaammini 4. januar 2019-imeersumi ilaatigut makku aammattaaq oqaatigai:

“B angerlartinneqarsinnaassanersoq isummertoqartinnagu meeqqanik inuusuttunillu sullissisartoqatigiit B eqqarsaatigalugu nakorsap immikkut ilisimasallip misissuinini pillugu nalunaarusiaa utaqpeqqaarsimavaat. Nalunaarusiaq kingulleq aatsaat 2018-imi novemberimi Paaqqinniffik I aqqutigalugu tiguneqarpoq – tassa peqqinnissaqarfimmi misissuinerup kingornatigut ukioq ataaseq qaangiutereersoq. [...]

Meeqqanik inuusuttunillu sullissisartoqatigiit suliamut atatillugu allagaatit tamarminusut tiguneqarsimatinnagit A-p saaffiginnissutaa isummerfigisinnaasimannigilaat, [...]” (Ombudsmandeqarfimmi nutsigaavoq)

Avannaata Kommuniata tamatuma saniatigut Ombudsmandeqarfimmik 7. februar 2019-imi ataatsimeeqateqarnermini oqaatigaa piffissaq suliamik suliarinninnermut atorneqartoq iluarinangitsutut isigigini. Kommunip aammattaaq oqaatigaa B-mik 2016-imi aamma 2017-imi misissuisimanerit pillugit paasissutissat kommunip arlaleriarluni nukingisaarutigisariaqartarsimagai.

Kiisalu Avannaata Kommuniata oqarasuaatikku 3. april 2019-imi oqaatigaa B-p peqqissusia pillugu paasissutissat saniatigut pissutsip A-p atugai aalajangiisoqarsinnaalersinnagu kommunip pitsaanerusumik aamma qulaajartiniarsarisimagai. Kommunip tamatumunnga peqatigitillugu oqaatigaa piffissami 2013-imit 2015-2016-ip missaata tungaanut suliami susoqarsimanagera kommunip nassuiaruminaatsikkaa, suliamimi ikittuinnarnik allakkiqarmat.

6. Uanga piffissamik suliap suliarineqarneranut atorneqartumik naliliinera

6.1. B angerlartikkumallugu A-p 2013-imi qinnuteqarnerata kingornatigut akuersisitsilluni inissiineq pineqarunnaarpoq. Taamaattumik qinnutigisaa akuerineqarsinnaanersoq imaluunniit B angerlarsimaffiup avataani inissisimaannassanersoq Qaasuitsup Kommuniata – 1. januar 2018-ip kingornatigut Avannaata Kommuniata – aalajangertussaavaa. Aalajangiineq sapingisamik pilertornerpaamik illersorneqarsinnaasumillu pissasoq ingerlatsinermi ileqqorissaarnerup nassataraa.

Avannaata Kommuniata uanga suliamik misissuininnut atatillugu oqaatigaa piffissaq suliamik suliarinninnermut atorneqartoq kommunip iluarinangitsutut isigigaa. Kommunip taamatut oqarnera isumaqatigisorujussuara.

Suliat katillugit ukiut tallimat sinnerlugit suliarineqarsimanera piffissamik suliamik suliarinninnermut atorneqartumik naliliininni pingaartillugu isiginiarpara.

Oqaatigaara B angerlartinneqassasoq A-p Qaasuitsup Kommunianut siullermik qinnutigimmagu B 12-inik ukioqartoq. Avannaata Kommunia B-p 18-inik ukioqalernissaa sioqqutitsiarlugu suliami aatsaat aalajangiivoq. Tassa suliaq B-p inuusuttuaraanerata ilarujussuani ingerlasimavoq.

Suliat angajoqqaat meeqqaminnik najugaqateqarnissamut periarfissaannut tunngasut immikkut pilertussuseqartumik suliarineqartussaasut uanga isumaqarnera pingaartillugu aammattaaq isiginiarpara.

Tamatumunnga atatillugu oqaatigaara angerlarsimaffiup avataanut inissineq angajoqqaatut oqartussaassutsimik tigummiaqartup isumaqatiginngisaa akuliuffisorujussuuartut isigineqartariaqartoq. Suliaq 2018-4 nittartakkanni atuarneqarsinnaasoq tamatumunnga atatillugu ilaatigut innersuussutigaa.

6.2. Suliat suliarineqarnerata ikinnerpaamik marloriarluni puigorneqartarsimanera pissutigalugu sivitsorsarneqarujussuarsimanera aamma pingaartillugu isiginiarpara.

Taamaalilluni A-p kommunimut 2013-imi saaffiginnissuteqarnerata malitsigisaanik suliamik suliarinninniarluni iliuseqartoqarsimanngilluinnartoq takuneqarsinnaavoq. Aammattaaq imatut paasisariaqarpara kommunip suliamik paasisutissartalersuilluni aallartinnera A-p kingusinnerusukkut 2014-imi saaffiginninnerata nassatarisimagaa, suliarli suli aalajangiisoqanngitsoq puigoqqinneqarsimasoq.

6.3. Piffissaq suliamik suliarinninnermut atorneqartoq kommunip siullermik tarnip nakorsaata oqaaseqaataanik tamatumalu kingornatigut tarnip pissusii-
nik ilisimasallip oqaaseqaataanik piffissami 2016-imit 2018-imit pissarsi-
niarsimaneratigut pisariaqanngitsumik sivitsorsarneqarsimanersoq aammat-
taa isumaliutersuutigaa.

Qaasuitsup Kommuniata aamma Avannaata Kommuniata uannut oqaase-
qaataat imatut paasisariaqarpakka kommuni naliliisoq suliaq angerlartitsi-
nermut tunngasoq isummerfigineqarsinnaassappat B-p peqqissusia pillugu
paasissutissat taakkua pissarsiariniarneqarnissaat pisariaqartoq. Naliliiner-
mulli tassunga tunuliaqutaasoq paasiuminaatsippara.

Taamaalillunga suliami allagaatit aamma kommunit oqaaseqaataat aallaavi-
galugit manna takusinnaanngilara, tassalu pissutsit B-p inissinneqaqqaarne-
ranut pissutaasut – pissutsit B-p peqqissusianut tunngasut apeqqutaatinna-
git – angerlartitsisoqarsinnaannginneranut suli pissutaasut kommuni misis-
suinerit taakku sioqqullugit naliliisimanersoq.

Imatut paasivara B tarnip pissusiinik ilisimasalimmit misissorneqartariaqar-
toq tarnip nakorsaata oqaaseqaataanit ersertera kommunip apeqqummik
taassuminnga naliliineranut aalajangiisuusimasoq. Aammali takuneqarsin-
naavoq tarnip nakorsaa naliliisoq B-mik angerlartitsineq piviusorsioortut
periarfissaanngitsoq.

Uanga paasinninnera unaavoq suliap manna takutikkaa, tassalu B-p anger-
lartinneqarnissaa kommunit periarfissaviunngitsutut – naak suliamik paasis-
sutissartalersuinerup ingerlanera taama sivistutigaluartoq – isigiuarsima-
gaat. Tamatuma aalajangiinermi kommunit A-mut sooq nalunaarutigisiman-
nginneraat paasiuminaatsippara.

Eqikkaallunga - suliaq pillugu oqaaseqaatit naatsuararsuit Avannaata Kom-
munianit tigusama ilaatigut nassatarisaannik – inerniliisariaqarpunga kom-
munit apeqqummik taassuminnga naliliinerannut tunuliaqutaasoq paasiumi-
naatsikkiga. Isumaqarpungali suliaq B-p peqqissusia pillugu paasissutissanik

kommunit pissarsiniarnerat sioqqullugu naammattumik paasissutissartaler-sorneqarsimanersoq – suliamilu iliuserineqartut taakku piffissap suliamik suliarinninnermut atorineqartup pisariaqanngitsumik sivitsorsarneqarneranik nassataqarsimanersut naliliinissannut uanga Ombudsmanditut suliaq pillugu ilisimasassanik pisariaqartunik peqanngitsunga.

6.4. Mannali pingaartillugu isiginiarpara, tassalu Avannaata Kommuniata piffissaq sivisoorujussuaq – ukiup ataatsip missaa - tarnip pissusiinik ilisimasallip oqaaseqaataanik Kalaallit Nunaanni Peqqinnissaqarfiup 2017-imi novemberimi suliarisimasaanik pissarsiniarnerminut atorsimagaa.

Imm. 3-mi oqaatigineqartutut kommunip uannut oqaatigaa tarnip pissusiinik ilisimasallip misissuinerani paasisat peqqinnissaqarfimmut nukingisaarutigisimagini. Tamannali suliami uppersarneqarsimanngitsoq takusinnaavara. Kommunip tamanna uannut oqaaseqaammuni aamma nassuiarsimanngilaa. Taamaattumik Avannaata Kommunia tarnip pissusiinik ilisimasallip oqaaseqaataa peqqinnissaqarfimmit pilertornerusumik pissarsiariniarlugu annertunerusumik iliuseqarsimasariaqaraluarnersoq nalilersinnaanngilara.

Uangali paasinninnera unaavoq kommunip suliami aalajangiinissaata uppersaammik oqartussaasumit allamit suliarineqareersimasumik pissarsiniarnermut kommunip ukiumik ataatsimik atuinera pissutigalugu ukiup ataatsip missaanik kinguartinneqarnera qanorluunniit pisoqaraluarpat akuerineqarsinnaanngitsoq.

Oqaatigaara uanga paasinninnera unaasoq kommuni suliami matumanisut ittumi paasissutissanik oqartussaasumit allamit amigaateqarnini pissutigalugu aalajangiisinnaanngikkuni paasissutissat amigaataasut pissarsiariniarlugit annertoorujussuarmik iliuseqarniartariaqartoq. Paasissutissat utaaqqaartuarneqarnissaat illersorneqarsinnaanersoq – paasissutissallu suliaq pilertornerusumik aalajangiiffiginnaajumallugu allatut iliorluni pissarsiarineqarsinnaanersut – kommunip ingerlaavartumik aammattaaq isumaliutersuutigisariaqarpaa.

6.5. Piffissamik suliap suliarineqarneranut atorneqartumik naliliininni makku eqqumaffigaakka, tassalu B piffissat ilaanni A-mi najugaqartarsimasoq, taamaattumillu piffissap suliamik suliarinninnermut atorneqartup pissutsit taakua marluk akornanniittut B soorlu Kalaallit Nunaata ilaani allami inissineqarsimasuuppat pisimasinnaasutut annertutigisumik kipisaqattaartissimanngikkai. Imm. 3-mi aallaqqaasiutitut oqaatigineqartutut nivarsiarraq ataatamini qanorpiaq sivisutigisumi najugaqartarsimansoq paasiuminaatsippara.

2017-imi aasakkut Nuugaatsiami Illorsuarnilu tassaarsuaqarnerata piffissamik suliamik suliarinninnermut atorneqartumik aammattaaq sivitsorsaaqataasimasinnaanera paasilluarsinnaavara.

6.6. Ataatsimut isiginnillunga paasinninnera unaavoq piffissaq suliamik suliarinninnermut atorneqartoq pissutissaqanngilluinnartumik sivisuallaartoq isorisariaqarluinnartorlu pineqartoq. Taamaattumik Avannaata Kommuniata piffissap suliamik suliarinninnermut atorneqartup iluarinanginneranik oqarnera isumaqatigisorujussuara.

Tungaviutittariaqarpara piffissaq suliamik suliarinninnermut atorneqartoq suliamik suliarinninnermi kukkunerit ilungersunartut arlallit nassatarisaannik ilaatigut pisariaqanngitsumik sivitsorsarneqarsimasoq, kommunillu suliamik suliarinninnerat piffissap suliamik suliarinninnermut atorneqartup suliani angajoqqaat meeqqallu akornanni pissutsinut tunngasuni qanoq aalajangiisuutigisumik pingaaruteqarneranik paasinninnginnermit sunnerneqarsimasoq.

Tamatuma Avannaata Kommuniata sulianik angerlartitsiniarnermut tunngasunik suliarinnittarnera eqqarsaatigalugu ataatsimut ernumassuteqarnissanut pissutissaqalersippaanga. Taamaattumik suliassaqarfik taanna siunissami malinnaaffiginiarpara.

Piffissaq suliamik suliarinninnermut atorneqartoq sivisooq taanna ilaatigut pissutaalluni B angajoqqaatut oqartussaassutsimik tigummiaqartoq akuersitinnagu tamanna pillugu aalajangiisoqanngikkaluartoq ukiut arlallit angerlar-

simaffiup avataani inissinneqarsimasimavoq. A-p Isumaginninnermi Naam-
magittaalliuuteqartarfimmut naammagittaalliornissamut periarfissaqarsi-
mannginnera tamatuma ilaatigut nassatarisimavaa. Uanga paasinninnera u-
naavoq A-p inatsiseqartitsinikkut innarlitsaalineqarnera taamaaliornikkut aa-
lajangiisuusumik sanngiillisinneqarsimasoq.

Uanga paasinninnera unaavoq suliami matumanisut ittumi angajoqqaatut o-
qartussaassutsimik tigummiqartup meeqqami akuersisitsilluni inissinneqar-
simasup angerlartinneqarnissaanik qinnuteqarfigisaani qinnutigisaq akueri-
neqarsinnaanersoq kommunip sapaatit akunnerisa arlallit sivisunerpaamil-
luunniit qaammatialunnguit ingerlaneranni isummerfigisariaqaraa.

7. Naggasiutaasumik oqaaseqaatit

Suliami aalajangiisuusumik sunniuteqartunik kukkussuteqartoqarsimallunilu
sumiginnaasoqarsimasoq isumaqarama Inatsisartut Inatsisinut Ataatsimiiti-
taliaat aamma Avannaata Kommuniani kommunalbestyrelsi tamatuminnga
nalunaarfiginiarpakka. Ombudsmandi pillugu inatsimmi § 23 innersuussuti-
gaara, tassuunalu aalajangersarneqarpoq annertunerusumik kukkussuteqar-
toqarsimanissaa imaluunniit sumiginnaasoqarsimanissaa ilimagisariaqartoq
misissuinerup takutippagu Ombudsmandi Inatsisartut Inatsisinut Ataatsimii-
titaliaannut tamatumunngalu peqatigitillugu Naalakkersuisunut imaluunniit
kommunalbestyrelsimut nalunaaruteqassasoq.

Isumaginninnermut Inatsisinillu Atuutsitsinnermut Naalakkersuisoqarfik su-
liaq pillugu ilisimatinniarlugu aammattaq aalajangerpunga.

Oqaaseqaat manna oqaaseqaammi pineqartut kikkussusii ilisarnarunnaar-
sillugit nittartakkakkut tamanut saqqummiunneqarumaarpoq, 2019-imilu u-
kiuumoortumik nalunaarutinni ilanngunneqarumaarluni.

Suliamik suliarinninnera matumuuna inaarlugu naammassivara.

SULIAP INGERLASIMANERA

B angerlarsimaffiup avataanut 2011-imi inissinneqarpoq. Suliap ilaata taasuma qanoq ingerlasimanera suliami allagaatit aallaavigalugit paasiuminaat-sippara, imatulli paasivara ilaqutariinni paarsassatut piffissami sivikitsumi inissinneqaqqaarsimasoq, tamatumalu kingornatigut Paaqqinniffimmi I-imi illoqarfimmi K-miittumi inissisimasimasoq.

Qaasuitsup Kommuniata A allakkatigut 23. november 2011-meersutigut nalunaarfigaa paniata B-p angerlarsimaffimmi avataanut inissinneqarnera kommunimi isumaginninnermi ataatsimiititaliap siulittaasuata 17. november 2011-mi akuerisimagaa, taamatullu aalajangiineq meeqqat pillugit peqqussummi § 10, imm. 1 aamma 2 angajoqqaatut oqartussaassutsimik tigummi-aqartoq akuersitinnagu inissiisarnernut tunngasut tunngavigalugit pisimasoq.

B Paaqqinniffimmi I-imi illoqarfimmi K-miittumi 28. november 2011-mi inissinneqartussatut allatsippoq.

B-p inissinneqarnera pillugu nutaamik aalajangiineq Qaasuitsup Kommuniata A-mut allakkatigut 23. april 2012-imeersutigut nalunaarutigaa. Aalajangiinnermit tassannga ilaatigut makku erserput:

“Matumuuna nalunaarutigineqassaaq Qaasuitsup Kommuniani isumaginninnermut ilaqutariinnermullu ataatsimiititaliap 17. november 2011 ataatsimiinnermini isumaginninnermut ilaqutariinnermullu ataatsimiititaliap siulittaasuata aaliangi-gaa, B-p angerlarsimaffiup avataanut inissinneqarnissaa, tusaatissatut tigusimammagu.

Siulittaasup aaliangiinera meeqqanik inuusuttunillu ikiorsiisarneq pillugu Inatsisartut peqqussutaanni nr. 1-imi, 15. april 2003-meersumi § 9, imm. 2, nr. 10 malillugu aaliangiineruvoq.”

Oqaatigaara meeqqat pillugit peqqussummi § 9, imm. 2, nr. 10 akuersisitsinani inissinernut tungasuusoq, suliamili allagaatit Qaasuitsup Kommuniarit tigusakka akuersineq pillugu uppernarsaatinik ilaqanngitsut.

Qaasuitsup Kommuniata suliami allagaataanut ilaavoq Qaasuitsup Eqqartuussiviata eqqartuussutaata allaqqinnera, tassanilu allassimalluni B-mut angajoqqaatut oqartussaassuseq A-mut 4. juli 2013-imi tunniunneqartoq.

A-p allagai 29. juli 2013-imi ullulernerqarsimasut imaattut Qaasuitsup Kommuniata 5. august 2013-imi tiguai:

“Qinnuteqaat

B-p uannut angerlartinnissaa

[...]

Matumuuna qinnuigaassi SU-ataatsimiititaliaq inunnik isumaginninnermut B-p uannut utertinnissaanut, Paaqqinniffik I-imiittoq. Massakkut malinnaarusukkam, aamma atuarfik uanga suleqatigalugu nuannaringakku. Aatsaat oqartussaaffik akisussaaffik qanittukkut allangartaq tingugakku, aamma piumaffigaassi uannut piaartumik utertinnissaa B-p.

Meeraq angerlarsimaffitsinni initoorujussuuvoq, aamma isumaqartorujussuuvoq uannut nuannersumik tunissuteqartarami. Neriunneq suli pigaarput tamatta, ullormiit ullormut neriunneq pigaarput. Ukiut 13-ingulersut kiisami oqartussaaffik akisussaaffik utaqqisara uannut tunniunneqarpoq. Uannut nuanneq, pilluarnaqaaq meeraq.”

B-p angerlartinneqarnissaa A-p allakkatigut 30. januar 2014-imeersutigut Qaasuitsup Kommunianut qinnutigeqqippaa.

Allakkiat marluk kommunip suliaataanut 2. februar 2014-imi ilanngunneqarput. Taakkunanga erserpoq A-p qinnutigisaa kommunip tigusimagaa, killifillu pillugu nalunaarusiaq aamma ukiup affakkaartumik nalunaarusiaq Paaqqinniffimmit I-imit pissarsiariniarneqassasut. Aammattaaq erserpoq A, B Paaqqinniffimilu I-imi attaveqarfiusartuq ataatsimiigiaqquneqassasut, iliuusissanut pilersaarut suliarineqarsinnaaniassammat. Kiisalu erserpoq a-

ngerlartitsisoqarnissaa kaammattuutigineqarsinnaanngitsoq, A-lu itigartinneqassasoq ataatsimiititaliamut inassuteqaatigineqassasoq.

B-p killiffia pillugu nalunaarussiaq 23. juni 2014-imeersoq Qaasuitsup Kommuniata Paaqqinniffimmit I-imit 30. juni 2014-imi tiguaa.

B pillugu iliuusissanut pilersaarut Qaasuitsup Kommuniata tamatuma kingornatigut suliaraa, taannalu A-mit 18. december 2014-imi atsiorneqarpoq. Iliuusissanut pilersaarummit ilaatigut makku erserput:

“B-p ataataminut attaveqarnissaa anguniarlugu qaammammut annerpaamik sisamariarluni ataatamini weekend-tertarnissaa B-mit kissaatigineqarpoq, aamma lu tamanna innersuunnarpoq. B-p angerlarnissaa iluatsissappat A-p aammalu qatanngutaasut qanoq ilaqutareeriaaseqarnerat misissuiffigineqassaaq, B-p angerlarnissaanut naliliinissaaq anguniarlugu.”

B-p killiffia pillugu nalunaarussiaq 15. juni 2015-imeersoq Qaasuitsup Kommuniata Paaqqinniffimmit I-imit 22. juni 2015-imi tiguaa.

Allakkiamit 8. april 2016-imeersumit erserpoq assigiinngitsunik suliallit B-p inunnik innarluutilinnik ikiorsiisarneq pillugu malittarisassani pineqartunut ilaatinneqalernissaanik qinnuteqaat pillugu kommunimi 17. marts 2016-imi ataatsimiissimasut. Aammattaaq erserpoq A-p B Dronning Ingridip Napparsimmavissuanut ingiaqatigissagaa, qulaajaanissaaq misissuinissarlu siunertaralugit. Allanneqarsimavoq misissuineq taanna pillugu akissut utaaqimaarneqassasoq. Kikkut ataatsimiinnermi peqataanersut allakkiami tassani takuneqarsinnaanngilaq.

B-p angerlartinneqarnissaanik qinnutigisami Qaasuitsup Kommunianit aki-neqannginnera A-p uannut faxikkut 30. maj 2016-imeersukkut naammagittaalliuutigaa. A ilaatigut imatut allappoq:

“Una ilissinnut suliaassanngortippara. Eqqunngittumik pineqarnera pillugu B-lu nalaattakkavut inuunermut innarluutigalugit, suli tarnikkut timikkut anniartinneqarluta B-lu. Aamma qasseriarlunga allangaqartarpunga, kisiannili akineqarneq

ajorlunga ulloq manna tikillugu. Taamaattumik ilissi peqatiseralusi B-p piaartumik utertinneqarnissaa. [...]

Isumaqarlunga eqqortumik sullinneqarlunga. Sunaaffa naamik. Inunnik ataatsimiititaliamut qasseriarlunga allannerpunga, akinerli ajorput ulloq manna tikillugu.”

Sulisuma ilaata A 8. juni 2016-imi ataatsimeeqatigaa. A-p ataatsimiinnermi tassani oqaatigaa angerlartitsinissaq siusinnerusukkut qinnutigisimagini, kingullertullu paasitinneqarsimalluni kommunip B suliaq pillugu isumaa tusarniarlugu oqaloqatiginiaraa. A-p aammattaaq oqaatigaa misigisimagini kommunip salloqittaraani, kommunilu isumaqartoq B angerlartinneqassanngitsoq.

Sulisuma ilaata Qaasuitsup Kommuniiani illoqarfimmi K-mi pisortatut suli-soq suliaq pillugu 9. juni 2016-imi ataatsimeeqatigaa. Suliap ataatsimiinneq sioqqullugu sukumiinerusumik misissorneqarsimannginnera kommunip ataatsimiinnermi oqaatigaa, aammali oqaatigalugu B A-mik akuersisitsilluni inissinneqarsimasutut isikkoqartoq, A-llu angerlartitsisoqarnissaa siusinnerusukkut qinnutigisimagaa, itigartinneqarsimallunili. Sulisora aammattaaq ilisimatinneqarpoq angerlartitsinissamik qinnutigisaa kommunip A-mit ullut 14-it sioqqullugu tigusimagaa, suliarlu kommunip nalilersorlugu ingerlakkaa. Oqaatigaara suliami 2018-imi decemberi sioqqullugu aalajangiisoqarsimanersoq suliami allagaatini Qaasuitsup Kommuniانيت aamma Avannaata Kommuniانيت tigusanni takuneqarsinnaanngitsoq.

A 23. juni 2016-imi ilaatigut imatut allaffigaara:

“Sulisuma ilaata Qaasuitsup Kommuniata allaffiani illoqarfimmi K-miittumi pisortatut sulisoq 9. juni 2016-imi oqaloqatigaa, taassumalu oqaatigaa panivit B-p angerlartinneqarnissaanik qinnutigisat kommunip 2016-imi majip qaammataata naanerani tigusimagaa, kommunillu suliaq suliarilersimagaa. Saaffiginnissutit kommunip tamatuma kingornatigut akissuteqarfiginiaarpaa.

Allakkavit 30. maj 2016-imeersut allakkat ukua assilinerannik ilaqartillugit Qaasuitsup Kommunianut ingerlateqqillugit nassiunneqarnissaat tamanna tunngavigalugu eqqornerpaasutut isigaara, kommunip suliami pilertornerpaamik akissagaatit imaluunniit – kommuni piffissap sivikinnerusup ingerlanerani akissuteqarsinnaangippat – akissutisinissat qaqugu naatsorsuutigisinnaagit kommunip paasitissagaatit illit qinnutigisattut.”

Tamatumunnga peqatigitillugu Qaasuitsup Kommunianut 23. juni 2016-imi allappunga, A-mullu ulloq taanna allakkama assilinerat ilanngullugu nassiullugu. Kommuni qinnuigaara kommunip A-mut akissutaata assilineru uannut nassiuteqqullugu.

A Qaasuitsup Kommunianut 10. august 2016-imi allappoq. A-p allagai imatut paasivakka B-p angerlartinneqarnissaa qinnutigeqqikkaa, erseqqissarlugulu oqaatigigaa tamanna siusinnerusukkat allakkatigut arlaleriaqaluni qinnutigisarsimagini.

Allakkat qulaani taaneqartut assilinerat 16. august 2016-imi tiguara.

Sulisuma ilaat Qaasuitsup Kommunianut 31. august 2016-imi sianerpoq, suliaq pillugu arlalinnik apeqquteqarniarluni. Kommunip ilaatigut oqaatigaa A ingerlaavartumik oqaloqatigineqartartoq, angerlartitsisoqassappallu kommunip annertunerusumik misissuinissaa piumasaaqaataasoq.

Allakkiamit 10. oktober 2016-imeersumit erserpoq Qaasuitsup Kommuniata A aamma B suliap pillugu ulloq taanna ataatsimeeqatigisimagai. B-p A-mi najugaqarusunnini ataatsimiinnermi oqaatigaa. Allakkiami oqaatigineqarpoq A oqartoq B aasaq junimili immini najugaqarsimasoq, "imminiittuaannarsimisorlu meeqqat angerlarsimaffiannut uffariartarnera atisaminillu taarsiiartarnera" eqqaassanngikkaanni. Allakkiamit aammattaaq erserpoq kommunip paasissutissat arlallit Dronning Ingridip Napparsimmavissuanit amigatigigai, B-llu peqqissusia pillugu paasissutissat arlallit – uanga paasisattut illoqarfimmi K-mi peqqissaavimmit - pissarsiariniarneqassasut. Allakkiamit aammattaaq erserpoq A, Paaqqinniffimmi I-imi sinniisoq kommunimilu

innarluutilinnik sullissisoq peqatigalugit attaveqatigiinnissaq siunertaralugu ataatsimiinnermut kingusinnerusukkut aggeqquneqarniarloq. Kiisalu allakkiamit erserpoq suliaq angerlartitsiniarnermut tunngasoq attaveqatigiinnissaq siunertaralugu ataatsimiittoqareerpat kommunimi isumaginninnermut ataatsimiititaliamit isummerfigineqarniarloq kommunip A-mut aamma B-mut ilisimatitsissutigisimagaa.

Tarnip nakorsaata "suliamut meeqqanut tunngasumut atatillugu oqaaseqaat" Uummannap peqqissaaviani 24. november 2016-imi Qaasuitsup Kommunianut suliaraa. Oqaaseqaammit erserpoq taanna kommunip "pisoq pillugu nakorsap oqaaseqaataa" pillugu apeqquteqaataa tunngavigalugu suliarineqarsimasoq. Oqaaseqaammit aammattaaq erserpoq nakorsaq naliliisoq B tarnip pissusiinut tunngasutigut sukumiisumik misissorneqartariaqartoq, taamaalilluni nukissaqarfigisai ajornartorsiutaalu qulaajarneqarsinnaaqqullugit, aamma "allamut nuutsinneqannginnerani sutigut ikiorneqarnissamik neqeroorfigineqartariaqarneranik apeqqummi eqqarsarluaqqissaartoqartariaqartoq. [...] Taarsiussassaq – ataataminiinnissaa – piviusorsiortutut isigineqanngilaq, tassanimi ineriartornissamut periarfissaqanngimmat, nukissallu pisariaqartut aamma pigineqanngivillutik".

Qaasuitsup Kommunia B pillugu attaveqatigiinniarluni ataatsimiinnermik taaneqartumut 12. december 2016-imi aggeqqusivoq. Aggeqqusissummit erserpoq A-mut atatillugu siunissami suliniutit attaveqatigiinniarluni ataatsimiinnermi oqaloqatigiissutigineqassasut. Suliami allagaatit Qaasuitsup Kommunianit tigusakka ataatsimiinneq taanna pillugu allakkiamik ilaqanngillat.

Katsorsaaneq pillugu nalunaarusiaq 13. januar 2017-imi ulluligaq Qaasuitsup Kommuniata Paaqqinniffimmit I-imit 30. januar 2017-imi tiguaa.

Sulisuma ilaata Qaasuitsup Kommunia 1. marts 2017-imi sianerfigaa, suliaq pillugu paasiniaalluni. Kommunip oqaatigaa suli aalajangiisoqarsimannngitsosq, B-mmi Dronning Ingridip Napparsimmavissuani misissorneqarnera pillugu paasissutissat kommunip utaqqimaarmagit. Kommunip aamma oqaatigaa A tamatumingga ilisimatinneqarsimasoq.

A uannut allakkani ilanngussartalinni 20. april 2017-imeersuni ilaatigut imatut allappoq:

“B, [...] pillugu

Piaartumik uannut angerlarnissaa qinnutingeqqippara. Aamma B-lu uangalu utaqqikatappugut, inuttut alloriarnissarput pissutingalugu.

Inuttut annaasaqaatikka pillungit, minnerunngitsumik B, annaasaqaaterpasuakka timikkut tarnikkut anniartittaqaannga, paniga pillugu. Aamma unitsittariaqarpoq, tassani unitsininarli, taamaattoqanngippat inunnik isumaginnittoqarfik eqqartuussivimmuut tunniutissavara, pisunut utaqqikatakatta.”

A aamma B Qaasuitsup Kommunanut 21. april 2017-imi saaffiginnipput. Kommunip ataatsimiinneq taanna pillugu allakkiaanit erserpoq B 23. december 2016-imit 14. februar 2017-ip tungaanut, Paaqqinniffik I peqatigalugu angalanissami tungaanut, A-mi najugaqarsimasoq. B angerlamut 14. marts 2017-imi apuunnermi kingornatigut A-mi najugaqaqqissimavoq. Allakkiamit aammattaaq erserpoq A-p “meeqqap angerlartinneqarnissaa minnerunngitsumik” kissaatigalugu oqaatigisimagaa. Taamatuttaaq allanneqarsimavoq A oqartoq B-p angerlarsimaffimmi avataanut inissinneqarnissaa akuerisimanngikkini. Allakkiamit aamma erserpoq kommunimi isumaginninnermi ataatsimiititaliap siulittaasua inissiineq pillugu suliap sularineqarnerani angajoqqaatut oqartussaassutsimik tigummiaqartoq akuersitinnagu angerlarsimaffiup avataanut inissiisoqarnissaanik aalajangiisimasoq.

Qaasuitsup Kommunian 11. maj 2017-imi allaffigaara A naammagittaalliummik nutaamik Ombudsmandeqarfimmut tunniussisimasoq, suliامي akisummik suli tigusaqarsimannginnami. Kommuni qinnuigaara aalajangeeqqullugu, kommunillu A-mut allagaasa assilinerat uannut nassuteqqullugu.

Suliami suli aalajangiisoqarsimannginnera Qaasuitsup Kommuniata Ombudsmandeqarfimmut oqarasuaatikkut 5. juli 2017-imi nalunaarutigaa, tassami meeqqanut tarnip pissusiinik ilisimasallip aamma meeqqanut tarnip

nakorsaata suleqatigiillutik sapaatit akunneranni 25-mi (19.-25. juni 2017-imi) illoqarfimmi K-miissimasut oqaaseqaataat kommunip utaqqimaarmagu. Kommuni oqaaseqaat tiguguniuk aalajangiiniarpoq. Kommuni Ombudsmandeqarfimmut ulloq taanna kingusinnerusukkut sianerpoq, oqaatigalugulu nakorsat immikkut ilisimasallit taakkua B ilumut misissorsimaneraat kommunip paasiniaraa, tamannami nalornissutigineqarmat.

Qaasuitsup Kommunian 24. juli 2017-imi allaffigaara suliame piffissamik suliamek suliarinninnermut atorneqartumik misissuineq aallartinniarlugu aalajangertunga. Kommuni tamatumunnga atatillugu qinnuigaara suliame allagaatit tamaasa kiisalu piffissaq suliamek suliarinninnermut atorneqartoq pillugu oqaaseqaat uannut nassiuteqqullugit.

Suliame allagaatit oqaaseqaallu una Qaasuitsup Kommunian allagaasigut 6. oktober 2017-imeersutigut tiguara:

“B pillugu suliame piffissaq suliamek suliarinninnermut atorneqartoq pillugu oqaaseqaateqaqqusinersi

A ilissinnut naammagittaalliuuteqareersoq B-p, 211200-6926, angerlartinniarneqarnera pillugu suliame piffissaq suliamek suliarinninnermut atorneqartoq pillugu saaffiginnissutersi Qaasuitsup Kommunian Sullissiviup illoqarfimmi K-mi isumaginnittoqarfiata qullersaqarfimmit tiguara.

B-p tarnip pissusiinik ilisimasalimmit sukumiisumik misissorneqarnissaa misissuinerullu taassuma illoqarfimmi K-mi peqqissaavimmi 24.11.2016-imi naliliiffigineqarnissaa utaqqimaarneqartoq illoqarfimmi K-mi isumaginnittoqarfiup siusinnerusukkut paasissutissiissutigaa. Tarnip pissusiinik ilisimasallip misissuiner suli naammassineqanngilaq. Meeqqanut tarnip pissusiinik ilisimasallip/meeqqat tarnikkut nappaataannik ilisimasallip/nakorsap sap. ak. 25/2017-imi [19.-25. juni 2017-imi; uanga ilanngussara] illoqarfimmi K-miinnissaa pilersaarutigineqarpoq, taannali illoqarfiup K-p eqqaani tassaarsuaqarneratigut ajunaarneq pissutigalugu kinguartinneqarluni.

Tarnip pissusiinik ilisimasallip namminersortup illoqarfimmut K-mukartillugu B-mik misissuisinnaaneranut periarfissaqarnersoq tamanna sioqqullugu upernaq

misissorsimagaluarparput, tamannali unitsikkallarnejarpog, tassami taamaalior-nissamut Peqqissaaviup meeqqanut tarnip pissusiinik ilisimasalimmik tikeraar-toqarfissaraluata nalaani aatsaat periarfissaqarsimammat.

Illoqarfimmi K-mi isumaginnittoqarfik naliliivoq B angerlartitsisoqarsinnaanerata isummerfigineqannginnerani pitsaanerpaamik ikiorneqassappat nukittuffiisa qu-laajarneqarnissaat utaqqimaaqqaartariaqaripput.” (Ombudsmandeqarfimmi nutsigaavoq)

Qaasuitsup Kommuniata oqaaseqaataa A-mut allakkatigut 19. oktober 2017-imeersutigut suliame illua'tungiusup isumaanik tusarniaatitut nassiup-para.

A-p oqaaseqaat taanna pillugu oqaaseqaatai e-mailikkut 21. november 2017-imeersukkut aamma 4. december 2017-imeersukkut tiguakka. A-p oqaaseqaatai imatut paasivakka B-p angerlartinneqarnissaa suli kissaatigi-gaa, isumaqartorlu kommunip pitsaanngitsumik pisimagaani salloqittarsima-gaanilu.

Suliame allagaatini ilaavoq Kalaallit Nunaanni Peqqinnissaqarfiup suliame al-lattuiffiutaa 23. november 2017-imeersoq, tassanngalu erserpoq B tarnip pissusiinik ilisimasalimmit illoqarfimmi K-mi ulloq taanna misissorneqarsi-masoq. Suliame allattuiffimmit tassannga erserpoq “ulloq unnuarlu ingerla-sumik isumaginninnermi perorsaanikkut annertuumik 18-iliinerata kingorna-tigut ingerlaqqittariaqartumik suli pisariaqartitsisoqartoq naliliisoqartoq”. B-p peqqissusia pillugu paasissutissat arlallit saniatigut erserpoq B tarnip na-korsaanit naliliiffigineqarnissaminut aamma tarnip pissusiinik ilisimasalimmit misissorneqarnissaminut 25. april 2018-imi innersuunneqarsimasoq. Ullua 25. april 2017-iusussaagaluartoq ilimagaara.

Sulisuma ilaata Avannaata Kommunua 13. februar 2018-imi sianerfigaa. Kommunip oqaatigaa suliame aalajangiisoqarsimanngitsoq, aalajangiinissa-milu B-p meeqqanut tarnip nakorsaanit tarnilluunniit pissusiinik ilisimasa-

limmit 2018-imi aprilimi illoqarfimmi K-miittussamit misissorneqarnissaa u-taqqimaarneqartoq.

Sulisuma ilaata Avannaata Kommunua 4. april 2018-imi attaveqarfigaa, suliami Ombudsmandeqarfimmut nassiunneqarsimannngitsumik siusinnerusukut aalajangiisoqarsimanersoq paasiniarlugu. Avannaata Kommuniata oqarasuaatikkut 5. april 2018-imi oqaatigaa suliaq sulisup misissorsimagaa, ki-siannili 2013-imi 2014-imilu aalajangiisoqarsimanersoq takuneqarsinnaanngitsoq. Kommunip allakkiaq 2. februar 2014-imeersoq innersuussutigaa, tassangalu erserpoq A-p itigartinneqarnissaa inassuteqaatigineqassasoq. Kommunip oqaatigaa piffissami tamatuma nalaani sulisut assut paarlagaasimasut, suliarlu ajoraluartumik puigortoorneqarsimassasoq. Suliami allagaatit kommunip nassiutereersimasaasa saniatigut suliami allagaatinik amerlanerusunik peqannginnera kommunip uppersarpaa.

Suliami allagaatinit erserpoq B-mik katsorsaanissamut pilersaarut Paaqqin-niffiup I-ip 10. maj 2018-imi suliarisimagaa.

Sulisuma ilaata A oqarasuaatikkut 11. juli 2018-imi oqaloqatigaa. Sulisuma oqaatigaa suliami allagaatit Qaasuitsup Kommunianit tigusakka tunngaviga-lugit paasisimagiga B-p angerlartinneqarnissaa A-p 2013-imi aamma 2014-imi qinnutigereersimagaa. A oqarpoq tamanna ilumoortoq, qinnutigisami-nullu sukkulluunniit akineqartarsimanani, oqaasiinnartigut allakkatigulluun-niit. A aammattaaq oqarpoq B-p angerlarsimaffimmi avataanut inissinneqar-nissaa akuereqqissimanngikkini.

Avannaata Kommunua 13. juni 2018-imi ilaatigut imatut allaffigaara:

“Angerlartitsiniarneq pillugu suliami piffissaq suliamik suliarinninnermut atorneqartoq

A-p panimmi B-p angerlarsimaffiup avataanut inissinneqarsimasup angerlartin-neqarnissaanik qinnutigisami Qaasuitsup Kommunianit akineqarsimannginnera pillugu naammagittaalliutaanut Qaasuitsup Kommuniata 6. oktober 2017-imeer-

sutigut oqaaseqaammik nassippaanga. Kommunip aamma suliame allagaatit nassiuppai.

Suliamut suli apequtissaqarpunga. A illoqarfimmi K-mi najugaqarpoq, Qaasuitsullu Kommuniata 1. januar 2018-imi avinnera pissutigalugu apequtissakka Avannaata Kommunianut apequtigissavakka.

Suliami allagaatit tigusakka tunngavigalugit, suliap qanoq ingerlasimaneranik tamakkiisumik paasinninngilanga. Paasinninneralu unaavoq Qaasuitsup Kommuni-ani sularinninnermi suliamik ingerlatsisoqarsimasinnaasoq Qaasuitsup Kommuni-anit uannut ingerlanneqarsimanngitsunik. Allakkat nanginneranni suliap tamakkiisumik ingerlaneranik paasinninnera nassuiassavara. Apequtiginiakkannillu nangitseqassapput.

Suliap tamakkiisumik ingerlaneranik paasinninnera

Qaasuitsup Kommunian allakkatigut 23. april 2012-imeersutigut A nalunaarfigaa B akuerineqartumik angerlarsimaffiup avataanut inissinneqartoq.

A-p panimmi B-p angerlartinneqarnissaa allakkatigut 29. juli 2013-imi Qaasuitsup Kommunianut qinnutigivaa. Kommunip allakkat 5. august 2013-imi tiguai.

Tamatuma saniatigut A-p angerlartitsisoqarnissaa Qaasuitsup Kommunianut 30. januar 2014-imi allakkatigut qinnutigeqqippaa.

A-p 30. maj 2016-imi Qaasuitsup Kommuniata suli akissuteqannginnera uannut naammagittaalliutigaa.

Sulisuma ilaata 9. juni 2016-imi Qaasuitsup Kommuniani illoqarfimmi K-mi immikkoortortaqaqarfimmi pisortaasumik suliap pillugu sivikitsumik ataatsimeeqateqarpoq. Immikkoortortami pisortaasup ilisimatitsissutigaa paasinnittaatsini malillugu A-p akuerisimagaa B-p angerlarsimaffiup avataanut inissinneqarnera, aamma A-p siusinnerusukkat angerlartitsinissaq qinnutigisimagaa, qinnuteqaataasorli akuersaarneqarsimanngitsaq. Immikkoortortami pisortaasup ilisimatitsissutigataaq ullut 14-it sioqqullugit kommuni A-mit angerlartitsinissamik qinnuteqaamik tigusaqarsimasooq.

Naammagittaalliut 23. juni 2016-imi Qaasuitsup Kommunanut ingerlateqqippa-
ra. Ilutigisaanillu kommuni A-mut akissuteqaqqullugu qinnuigalugu.

B-p angerlartinneqarnissaanik 16. august 2016-imi (10. august 2016-imi ulluler-
neqartunik) A-mit saaffigineqaqqippunga. Qaasuitsup Kommunanit allagaatini ti-
gusanni takuneqarsinnaavoq saaffiginnissut Qaasuitsup Kommuniata 15. august
2016-imi tigusimagaa.

Qaasuitsup Kommunanit allagaatini tigusamma ilaanni allakkiami 10. oktober
2016-imi ullulernerqartumi takuneqarsinnaavoq, ulloq taanna kommunip A
aamma B ataatsimeeqatigisimagai. Allakkiamit erserpoq B-p ataatsimiinnermi o-
qaatigigaa angummini najugaqarnissi kissaatigigini.

Sulisuma ilaata 1. marts 2017-imi Qaasuitsup Kommuniani sulisut ilaat oqarasu-
aatikkut suliaq pillugu paasiniaaffigaa. Kommunip ilaatigut ilisimatitsissutigaa suli
suliamut aalajangiisoqarsimanngitsoq, B-mik Dronning Ingridip Napparsimmavis-
suani misissuinnermiit paasissutissat peqqinnissaqarfimminngaanniit takkunnis-
saat kommunip utaqqimaarmagu.

A-p allakkatigut 20. april 2017-imeersutigut Qaasuitsup Kommuniata suliami aa-
lajangiisimannginna uannut naammagittaalliutigeqqippaa.

Qaasuitsup Kommunanit allagaatinit tigusanni allakkiat ilaanni takuneqarsinnaa-
voq A aamma B 21. april 2017-imi kommunimut saaffiginneqqissimasut, saaffi-
ginninnermilu A-p panimmi angerlartinneqarnissaa kissaatigisimagaa, aamma ili-
simatitsisimasoq angerlarsimaffiup avataanut inissinneqarnissaanik akuersisima-
nani. Allakkiami atuarneqarsinnaavoq suliami aalajangiisoqarsimasoq, takune-
qarsinnaanngilarli A aalajangiinermik nalunaarfigineqarnersoq.

Qaasuitsup Kommunia allakkatigut 11. maj 2017-imeersutigut suliami aalajangi-
nissaanik qinnuigaara.

Qaasuitsup Kommunia 24. juli 2017 allaffigeqqippara. Taamaaliornikkullu kom-
muni qinnuigalugu suliami aallagaatit nassiuteqqullugit suliallu ingerlanneqarne-
ranut piffissamik atuinermut oqaaseqaammik aamma qinnuigalugu. Qaasuitsup
Kommunia 6. oktober 2017-imi akivoq B-p meeqqanut tarnip pissusiinik ilisima-
salimmit misissorneqarnissaa utaqqineqartoq.

Sulisuma ilaat aprilimi 2018-imi Avannaata Kommunianut oqarasuaatikkut attaveqarpoq apeqqutigalugulu 2016-imi kommunimi sulisut ilaata ilisimatitsissutigisimagaa siusinnerusukkut A-p angerlartitsinissamut qinnuteqaataa itigartinneqarsimasoq, kisiannili taamatut aalajangiineq suliami allagaatini takuneqarsinnaanngitsoq. Kommunimi sulisut ilaata ilisimatitsissutigaa, takuneqarsinnaanngitsoq 2013-imi 2014-imilu suliami aalajangiisoqarsimanersoq, aamma allagaatit pigineqartut tamarmik Ombudsmandeqarfimmut nassiunneqarsimasut. Sulisup ilisimatitsissutigaa piffissami tassani sulisut akornanni taarseraattoqarsimasoq, malitsinganillu qinnuteqaat ajoraluartumik puigorneqarsimalluni.

Sulisuma ilaata 11. juli 2018-imi A oqarasuaatikkut attaveqarfigaa. Oqaloqatigininnermi A-p ilisimatitsissutigaa aasakkut 2013-imi angajoqqaatut oqartussaaffimmik tigusereerinnermi kingorna B-p angerlartinnissaa Qaasuitsup Kommunianut qinnutigisimallugu, angerlarsimaffiullu avataanut inissisimaannarnissaa akuerisimanagu, aamma allakkatigut oqaasiinnartigulluunniit angerlartitsinissamut qinnuteqaatigisaminut akissutisisimanani.

Suliami apeqquteqaatikka

Suliami ilisimatinneqarnera malillugu paasisara unaavoq A-p allakkatigut 29. juli 2013-imeersutigut Qaasuitsup Kommunianut panini B angerlartinniarlugu qinnuigigaa, suliarlu maanna suli ingerlasoq.

Taamaattumik uanga paasinninnera unaavoq A 29. juli 2013-imiilli B-p immini najugaqarnissaa kissaatigiuarsimagaa, aamma Qaasuitsup Kommunianut Avannaataluunniit Kommunianut suliami aalajangiisimannngitsoq.

1. Tamanna tunngavigalugu uanga tamakkiisumik suliamik paasinninnera, piffissap suliamik suliarinninnermut atorneqartup sivissusua isumaqatigineraa paasissutisseeqqullugu Avannaata Kommunianut qinnuigaara.

2. A-p angerlartitsinissamik qinnuteqaataa 29. juli 2013-imiilli suliaalersimannngitsoq Avannaata Kommunianut isumaqarpat kommuni tunngavilersuissasoq, suliamilu allagaatinik kommunip isumaanik tunngavilersuisooqataasunik nassiussissasoq qinnuigaara.

3. Qaasuitsup Kommunianit suliamut allagaatini tigusanni, allakkatigut oqaasiinnartigulluunniit nalunaarsukkamik aalajangiinermik takussaasoqanngilaq. Avannaata Kommuniata A-mut oqaasiinnartigut, allakkatiguunngitsorli, suliap suliarinerani nalunaarsimasutut isumaqaruni, kommuni qinnuigaara sooq aalajangiineq taamatut A-mut nalunaarutigineqarnerseq sukumiinerusumik nassuiaqqullugu qinnuigaara.

Oqaatigaara inatsilerinikkut allagaatini, ingerlatsineq pillugu ileqqorissaarnermi allakkatigut qinnuteqaatit kissaateqaataasulluunniit allakkatigut akineqartartus-satut nalinginnaasutut isigineqarmat, soorlu aamma aalajangiinerit inuit inuunerannut annertuumik sunniuteqartussat allakkatigut nalunaarutigineqartarnissaat taamatuttaaq isigineqartoq. Ilanngullugu nalinginnaasumik isigineqartarpoq aalajangiinerit oqaasiinnartigut nalunaarutigineqarsimappatta malitsigisaanik suliamut allakkiamik nalunaarsorneqassasut ingerlatsineq pillugu ileqqorissaarnermiittoq.

Ilaatigut Niels Fengerip atuakkiaani "Forvaltningsret"-imi (2018-imeersumi) quppernerit 628 tullialu innersuussutigaakka.

4. Soorlu oqaatigereeriga paasivara suliaq ukiuni arlalinni suliarineqartoq. Tamanna tunngavigalugu Avannaata Kommunia suliap sivisoorujussuarmik ingerlasimaneranut suut patsisaasimanersut nassuiaaqqullugu qinnuigaara.

5. Malitsigisaanik piffissamik suliamik suliarinninnermini atorneqartoq ingerlatsinerlu pillugu ileqqorissaarneq malillugu suliarinnittoqarsimanersooq Avannaata Kommunia nassuiaaqqullugu qinnuigaara.

6. Suliaq suli ingerlassappat, sooq taamaannersooq Avannaata Kommunianut nassuiaaqqullugu qinnuigaara.

7. Qaasuitsup Kommuniata 6. oktober 2017-imi suliami allagaatinik nassiussinerata kingornatigut suliamut allagaatit ilanngussimasut Avannaata Kommunianit uannut nassiateqqullugit qinnuigaara.

8. Soorlu aallaqqaasiullugu oqaatigigiga Qaasuitsup Kommunianit suliami allagaatit tigusakka tunngavigalugit, suliap qanoq ingerlasimaneranik tamakkiisumik ingerlatsisimanermik paasinninngilanga. Taamaattumik angerlartitsinissamat a-

peqqummi suliami iliuuserisimasat ullukkaarlugit nalunaarsorneri Avannaata Kommuniata nassiutissagai qinnutigaa.

Ilanngullugu suliap sukkanerusumik inaarneqarsinnaaneranut Qaasuitsup Kommuniata Avannaatalu Kommuniata iliuuserisimasaannik Avannaata Kommunianassuiaateqaqqullugu qinnuigaara.”

Allakkiamit 25. september 2018-imeersumit ersepoq A Avannaata Kommuniata 17. september 2018-imi ataatsimeeqatigisimagaa, tassanilu oqarsimasoq B piffissap annersaani immini najugartarsimasoq. Allakkiamit aammattaaq ersepoq meeqqat inuusuttullu pillugit suliassaqarfimmi sulianik suliarinnittut “uterpata” suliap pingaarnersiulluni tulleriarinermi salliutinneqarnissaa kaammattuutigineqartoq.

Avannaata Kommuniata oqaaseqaataa imaattoq e-mailikkut 25. september 2018-imeersukkut tiguara:

“Suliami angerlartitsinissamik qinnuteqaammut tunngasumi piffissaq suliamik suliarinninnermut atorineqartoq

B-p, [...] angerlartinneqarnissaanik qinnuteqaat pillugu nutaamik nalunaarfigineqarnissaminik allakkatigut 13. juli 2018-imeersutigut Ombudsmandi qinnuteqarpoq.

Illoqarfimmi K-mi Paaqqinniffimmit I-imit B-mut tunngatillugu katsorsaanissamut pilersaarut kingulleq ilanngullugu nassiupparput, tassani B-p Illoqarfimmi K-mi Paaqqinniffimmi I-imi inissisimaannarnissaa kaammattuutigineqarluni. B-p innarlutillit nalunaarsorneqarnissaa Paaqqinniffiup I-ip taamatuttaaq kaammattuutigaa.

Ataataasumik A-mik 17. september 2018-imi oqaloqateqarninni paasitineqarpuunga ukiumi qaangiuttumi piffissap annersaani B ataamini angerlarsimasimasoq.

Meeqqanik inuusuttunillu sullissisartut pingaarnersiullutik tulleriarinerminni suliamik salliutitseqqullugit qinnuigineqassapput, piffissap sivisuup ingerlasimaneera, peqatigitillugu Paaqqinniffimmit I-imit A-millu nalunaarutaasartut imminnut

akerleriittarnerat, aamma eqqarsaatigalugit.” (Ombudsmandeqarfimmi nutsigaavoq)

Avannaata Kommuniata e-mailikkut 26. september 2018-imeersukkut aqaguanilu sianerluni malugeqqullugu oqaatigaa kommunip uannut oqaaseqaataa 25. september 2018-imeersaq apeqqutitut allakkanni 13. juli 2018-imeersuni apeqqutigisannut akissummik imaqaanngitsoq. Kommunip oqaatigaa suliaq misissorniarini.

Sulisuma ilaat Avannaata Kommunianut 26. oktober 2018-imi sianerpoq, allakkama 13. juli 2018-imeersut kommunimit akineqarnissaanni killiffik paasiniarlugu. Ingerlatsivik sukumiinerusumik akissuteqaqqullugu qinnuigineqarniarloq kommunip oqaatigaa.

Avannaata Kommuniata Paaqqinniffik I 7. november 2018-imi qinnuigaa iliuusissanut pilersaarutip suliarineqarnerani atugassamik killiffik pillugu nalunaarusioqqullugu.

Allakkiamit 15. november 2018-imeersumit erserpoq A B-p angerlartinneqarnissaa pillugu Avannaata Kommunianut allakkatigut 10. august 2016-imi saaffiginnissimasoq, sulialli misissorneqarnerani “suliaq angerlartitsiniarnermut tunngasoq suli suliarineqarsimanngitsoq” paasinarsisimasoq, taamaatumillu allakkat suliaralugit aallartinneqarsimasut.

Avannaata Kommuniata illoqarfimmi K-mi peqqissaavik B-p inunnik innarluutilinnik ikiorsiisarneq pillugu malittarisassat tunngavigalugit ikiorserneqarnissaanik qinnuteqaammi atugassanik nakorsap oqaaseqaataanik nakorsallu immikkut ilisimasallip oqaaseqaataata assilineranik 21. november 2018-imi qinnuigisimavaa. Immersugassat arlallit suliami tassani atugassat A-p ulloq taanna atsiorpai.

Illoqarfimmi K-mi ilaqutariinnik sullissiviup isumaginninnermi ataatsimiititaliamut inassuteqaat suliamut angerlartitsiniarnermut tunngasumut atatillugu suliaraa. Oqaatigaara inassuteqaat taanna – suliami allagaatini Avannaata

Kommunianit tigusanni ilaasoq – ullulernerqarsimangitsoq atsiorneqarsimanilu. Inassuteqaammit ilaatigut makku erserput:

“Illoqarfimmi K-mi ilaqutariinnik sullissivimmiit paasissutissiissutigisinnaavarput imaattoq:

Allagaqaat ullulernerqarsimasoq 10. august 2016 taavalu sullissisuanut allakkat tunniunneqarsimasut ulloq 15. august 2016. Ajoraluartumik suliarineqarsimarpalaangimmat maannakkut ingerlatinneqalerpoq aammalu ataataasoq tusagaqarneq ajorami Inatsisartut Ombudsmandiannut allagaqarsimasoq paasivarput Ombudsmandimiillu innersuussutigineqarsimalluni suliaq naammassineqassasoq ataataasullu allagarsiaasa assingamik nassiuussivigineqassalluni kissaatigisimagaa.”

A Avannaata Kommunianit allakkatigut 5. december 2018-imeersutigut nalunaarfigineqarpoq B-p angerlarsimaffimmi avataani inissinneqarnissaanik aalajangiineq aalajangiusimaniarlugu isumaginninnermi ataatsimiititaliap siulittaasua aalajangertoq. Allakkanit ilaatigut makku erserput:

“Avannaata Kommuniani illoqarfimmi K-mi ilaqutareeqarnermut immikkoortortaqarfiata nalunaarutigissavaa [...] 18-ileereeraluaruniluunniit ulloq unnuarlu paaqqutarineqarnissaminik pisariaqartitsineranik naliliinera naapertorlugu panivit angerlarsimaffiup avataanut isumaginninnermi ataatsimiititaliap siulittaasuata panivit angerlarsimaffiup avataanut inissinneqarsimaneranut akuersisimanera attatiinnassallugu aaliangiummagu.”

A Avannaata Kommunianit allakkatigut 6. december 2018-imeersutigut ilaatigut imatut nalunaarfigineqarpoq:

“Matumuuna nalunaarutigineqassaaq Avannaata Kommuniani ilaqutareeqarnermut ataatsimiititaliaq ulloq 5. december 2018 ataatsimiinnermini aalajangermat itigartissallugu, meeqqat B angerlartitsinissamik qinnuteqaatit pillugu.

Inatsit meeqqat tapersorsorneqarnissaannut Inatsisartut inatsisaat nr. 20, 26. juni 2017-imeersoq § 27 aamma § 30, stk. 2, nr. 2.”

B [...] december 2018-imi 18-inik ukioqalerpoq taamalu nammineersinnaas-suseqalerluni.

Avannaata Kommuniata oqaaseqaataa nutaaq e-mailikkut 4. januar 2019-i-meersukkut tiguara, tassangalu makku erserput:

“Angerlartitsinissamik qinnuteqaammut tunngatillugu piffissaq suliamik suliarinninnermut atorneqartoq pillugu nassuiaat

B-p, [...], angerlartinneqarnissaanik kissaateqarluni ataataata illoqarfimmi K-mi taamanikkut isumaginninnermik ingerlatsiviusumut qinnuteqaataa pillugu piffissaq suliamik suliarinninnermut atorneqarsimasoq pillugu siusinnerusukkut akisutitsinnut matumuuna ilassuteqarpugut.

B angerlartinneqarsinnaassanersoq isummertoqartinnagu meeqqanik inuusuttunillu sullissisartoqatigiit B eqqarsaatigalugu nakorsap immikkut ilisimasallip misissuinini pillugu nalunaarusiai utaqeqqaarsimavaat. Nalunaarusiaq kingulleq aatsaat 2018-imi novemberimi Paaqqinniffik I aqqutigalugu tiguneqarpoq – tassa peqqinnissaqarfimmi misissuinnermit ukioq ataaseq qaangiutereersoq. Taanna ilanngussatut nassiunneqarpoq.

Meeqqanik inuusuttunillu sullissisartoqatigiit suliamut atatillugu allagaatit tamar-miusut tiguneqarsimatinnagit ataataasup saaffiginnissutaa isummerfigisinnaasi-mannngilaat, tamannalu ataataasumut paasissutissiissutigineqarsimavoq.

Suliaq maanna imatut inissisimavoq: Maanna innarluutilittut nalunaarsorneqar-nissaq pillugu suliaq ingerlavoq, tamatumalu kingorna B ulloq unnuarlu paaqqin-nittarfimmut piukkunnartumut allamut inissinneqartussatut inassutigineqaru-maarluni. Tamanna ataataasumit B-millu 21.11.2018-imi innarluutilinnik sullissi-sumik oqaloqateqarnermi akuerineqarpoq.” (Ombudsmandeqarfimmi nutsigaavoq)

Avannaata Kommuniata Kalaallit Nunaanni Peqqinnissaqarfiup suliami allat-tuiffiutaa 23. november 2017-imeersoq oqaaseqaammut ilanngullugu nas-siuppaa.

Sulisuma ilaasa marluk Avannaata Kommuniiani sulisut marluk suliaq pillugu 7. februar 2019-imi ataatsimeeqatigaat. Kommunip ilaatigut oqaatigaa piffissaq suliamik suliarinninnermut atorneqartoq kommunip iluarinangitsutut isigigaa. Kommunip aamma oqaatigaa B-p 2016-imi 2017-imilu misissorneqarnera pillugu paasissutissat kommunip arlaleriarluni nukingisaarutigisariaqartarsimagai. Taamaalilluni nakorsap immikkut ilisimasallip B-mik misissuisup nalunaarusiaa kommunip aatsaat 2018-imi novemberimi tigusimavaa. 2016-imi misissuineq pillugu paasisat kommunip suli tigusimangilai. Kommunip aammattaq oqaatigaa angerlartitsiniarnermik apeqqutip suli isummerfigineqannginnera nakorsap paasissutissiissutaasa suli tiguneqarsimannginnerannik angerlarsimaffimmilu pissutsinik naliliinissap pisariaqarsimanagera pissutaasut. Aammattaq oqaatigineqarpoq kommuni suliami 2018-imi decemberip aallartinnerani aalajangiisimasoq. Kommunip aamma oqaatigaa tamatuma saniatigut suliami siusinnerusukkut aalajangiisoqareersimagunartoq. Kommunip tamanna misissorumallugu kiisalu allakkanni 13. juli 2018-imeersuni apeqqutit sinnerinut akissutit aamma suliami allagaatit suliamut ilanngunneqarsimasinnaasut nassiunneqarnissaat neriorsuutigaa.

B-p angerlartinneqarnissaanik A-p qinnutigisaata itigartinneqarnissaanik kommunip aalajangiinerata 6. december 2018-imeersup assilinerata Avannaata Kommuniiani 8. februar 2019-imi tiguara.

B suliamik angerlarsimaffiup avataanut inissinneqarsimaneranut tunngasumik suliarinninninnik 1. marts 2019-imi ilisimatippara, tassami 2018-imi decemberimi 18-inik ukioqalersimammat.

Kommunip suliaataani B-p innarluuteqarneranut tunngasumi allagaatit oqaaseqaallu nutaaq Avannaata Kommuniata uannut allakkatigut 13. marts 2019-imeersutigut nassiuppai. Oqaaseqaammi imaattunik allassimasoqarpoq:

“Angerlartitsinissamik qinnuteqaammik piffissami sivisuumi suliamik suliarinninnermut atatillugu suliami allagaatit aammalu

B [...] ataataasullu angerlartinneqarnissaanik kissaataannut atatillugu suliami allagaatit nutaat Nuummi 07.02.2019-imi ataatsimiinnermi isumaqatigiissutigisatitut nassiuppakka.

Qularutigisimangilluinnaraluarpara B-p angerlartinneqarnissaanik itigartitsilluni Isumaginninnermut Ataatsimiititaliap aalajangiinera siusinnerusukkut takusimallugu, angerlareeramali paasillugu suliaq alla suliaq manna pillugu eqqaamasannut akuleruttoorsimallugu. Taamaattumik angerlartitsinissamik qinnuteqaat pillugu siusinnerusukkut aalajangiinermik nassaarsinnaasimangilanga.

Taamatuttaaq ilannguppakka innarluutilinnut tunngasunik sulianik ingerlatsisartutta suliami allagaatai, innarluutilinnut nalunaarsorneqarnissamik suliamut ingerlasumut tunngasut, sulilu suliaq ingerlateqqinneqarsinnaassappat nakorsap oqaaseqaataanik utaqqivigineqartut.

Suliami allagaatit nalinginnaasumik ulapputeqarnek, kisiannili aamma sulisussanik amigaateqarnek, pissutigalugit kingusissukkut nassiunneqarnerat utoqqatsisutigaara.

Sukumiinerusunik atorfissaqartitsissagussi attaveqaqqinnissassinut tikilluaqqusaavusi." (Ombudsmandeqarfimmi nutsigaavoq)

Sulisuma ilaata Avannaata Kommunia oqarasuaatikkut 3. april 2019-imi attaveqarfigaa, suliaq pillugu arlalinnik apeqquteqarniarluni. Kommunip ilaatiqut oqaatigaa piffissami 2013-imit 2015-2016-imut suliamik suliarinninnermi iliuutsit suut iliuuserineqarsimanersut sukumiinerusumik paasissutissiisqarsinnaanngitsoq, tassami allakkianik piffissamit tassannganneersunik peqanngingajammat.

Avannaata Kommuniata oqaaseqaatai 25. september 2018-imeersoq, 4. januar 2019-imeersoq aamma 13. marts 2019-imeersoq A-mut suliami illua'tungiusup isumaanik tusarniaatitut allakkatigut 16. maj 2019-imeersutigut nassiuppakka.

A-p oqaaseqaataanik tigusaqanngilanga.